

近代中國史料叢刊第十五輯
沈雲龍主編

撫
滇
奏
議

張凱嵩著

文海出版社印行

撫滇奏議

洪德埈謹署

癸巳三月江夏
張氏益齋開雕

撫滇奏疏目錄

卷一

謝調滇撫摺

覆礦務摺

奏開礦事宜摺

奏鹽務煎銷未暢請緩啓徵摺

奏邊防孔亟需餉甚殷摺片

籌擬滇省邊防摺

保薦人才摺

奏撥動存款摺

請勸捐濟饑摺

奏普洱府地震摺

奏夷裸滋事摺片

奏辦教堂滋事摺片

奏鮑軍設局轉運摺片

卷二

圍剿祿勸夷匪摺

夷匪原委摺片

懲辦迤東匪犯摺片

籌防緬匪摺片

籌維滇省大局防閑教民四條摺
條陳附

謝 頒賜

穆宗毅皇帝聖訓全部摺

緬匪滋事摺

報緬匪剿平摺片

報霆軍抵滇省摺片

奏關外需餼摺

會匪捏詞京控摺

請辦會匪摺片

謝 賜

御書福字摺

續獲新街餘匪摺片

請定米捐章程摺片

卷三

覆礦務情形摺

請催協饒摺片

奏辦昭通匪犯摺片

請 旌獎孝子摺片

奏逸匪煽聚窺伺大理情形摺

奏獲逸匪摺片

覆查明緬甸邊防道路摺

報英緬情形摺

報英緬決戰摺

報英緬議和摺片

奏獲黑蠻賊渠摺

報英人詐取緬地摺

覆緬甸邊防並礦務情形摺

卷四

條陳籌邊四事摺

條陳附

奏英緬相持摺

覆查大理設立回回教堂摺片

奏英據緬地摺片

請 旌獎孝婦摺

奏緬敗英人摺

報緬事近日情形摺

擊退蠻匪摺片

報邱北縣地震摺片

奏兵練互歐摺片

請變通礦務章程摺

請 旌獎孝婦摺

奏酌籌經費以濟夫馬而省支銷摺

--	--	--	--	--	--	--	--	--	--

撫滇奏疏卷一

謝調滇撫摺

奏爲微臣調補滇撫叩謝

天恩並覆陳革撫唐 已委解起程情形恭摺仰祈
聖鑒事竊臣於光緒十年四月二十一日接准吏部
咨光緒十年三月十七日奉

上諭前因法國越南構衅交兵雲南邊防緊要迭經
諭令唐 出關督率防軍固守邊疆門戶乃該撫
並未奉有諭旨率行回省置邊事於不顧以致官

軍退紫山西失守唐 不知緩急遇事退縮殊堪
痛恨前已密諭張凱嵩馳赴雲南傳旨將唐 革
職拏問規計張凱嵩應已至滇卽著派員將該革
員迅速解京交刑部治罪雲南巡撫著張凱嵩補
授貴州巡撫著李用清署理欽此 臣 跪聆之下感
惕莫名謹卽於是日恭設香案望

闕叩謝

天恩伏查雲南地處極邊時常多事軍儲吏治在在
皆緊要所關 臣 以菲材兼疎閱歷暫時權篆猶

懼弗勝茲復仰沐

恩綸邊圻調任荷

鴻慈之迭被益報稱之難圖惟有隨事與督臣和衷
共濟實力籌維以期仰慰

厘念南服至意至革撫唐 前臣於抵滇後卽宣

旨拏問派員候補知府冷繼先護解業於四月二十
日起程並咨會貴州湖南湖北河南直隸等省
一體撥護當將起解日期繕摺

奏報在案茲欽奉前因除恭錄再行咨會沿途各

督撫臣催趙前進毋任羈延外所有革撫唐業已委解起程並微臣調補滇撫日期謹恭摺由驛覆陳叩謝

天恩伏乞

皇太后

皇上聖鑒訓示謹

奏

覆礦務摺

奏爲滇省集股開採銅礦正在設法招徠欽奉

諭旨查詢謹將現籌辦理情形據實覆陳仰祈

聖鑒事竊雲南本產銅之區京運歲有定額兵燹以

後厥無富商承辦者力薄貲微見小欲速作輟

無常辦理日形棘手前經督撫臣會籌整頓遵

旨奏請仿照公司於上海總滙地方招商集股剋期

舉行實變通之良法乃甫經委員設局粗有端

倪適值上年秋閒滬商倒閉生業蕭條其已經

入股之人又以雲南邊隅寫遠法越兵端未息
羣情疑沮觀望不前久無成效臣到滇後以銅
務爲目前要圖期供鼓鑄之資藉杜覬覦之漸
月來詳稽案牘博訪周諮蚤作夜思力圖挽救
正在分別籌辦間閏五月初二日接准戶部文
行光緒十年五月初一日奉

上諭戶部奏籌議雲南礦務請飭及時開採一摺現
在岑毓英駐紮邊關一切應辦事宜張凱嵩責無
旁貸著卽遴選廉幹之員廣集商力及時開採力

杜因循侵漁積習以期無弊不革有利必興該督
撫當仰體朝廷實事求是之意大加開拓實力奉
行並將近來採辦情形先行據實具奏欽此臣跪
聆之下悚惕彌深自維身任封圻礦務乃大局
所關必當未雨綢繆及時振作惟招商集股全
賴經理得人查原派委員江蘇補用道胡家楨
廣西補用知府張家齊候選知府卓維芳等於
上海廣東等處設局招徠昨據具稟到臣意固
急公事仍掣肘臣當卽手書敦勉告以現在滇

境肅清邊防謐靜礦苗豐旺利益可圖事機勿失並以胡家楨任事真誠商令再於湖北江西廣爲延攬以濟要需張家齊係廣西屬員臣素知其篤實精明催令集有成數迅卽來滇又前撫臣唐炯曾派候選通判王熾赴川招商亦檄催剋日往辦以期有成至卓維芳所辦機器業經運到現飭與雲南補用知府全懋績會辦礦務總局事宜全懋績厥情熟習廉幹有爲此次招集商本僅據胡家楨解到銀二萬五千兩全

楸績又挪貸銀五萬兩於東川府地面先行開採據稟覓獲朝陽洞寶台二處礦極豐旺惟需費孔亟集股績到無項接濟難籌深以爲慮臣維事莫難於創始功每敗於垂成當此離合斷續之交勢須量子通融俾礦務早著成效庶集貲者源源而來爰函商督臣於司庫銅本項下暫借銀數萬兩俾免缺乏嗣後商本解到仍卽提還以清眉目人情有害則避有利則趨仰仗聖主威福遐敷地不愛寶海不揚波數月之間礦務

當有起色臣閱歷短淺不敢謂驟著成效亦決不敢稍事因循惟有鼓舞商情剔釐廠弊冀銅政月異日新此外金銀錫鉛查有產於邊境者卽當次第開採以絕窺伺而裕利源再商股尙未集成京銅亟須籌解現在永北易門麗江楚雄等廠仍循舊章官督紳辦以期聚少成多無誤起運合併陳明所有遵

旨飭查雲南礦務及近來籌畫採辦各情形謹會同雲貴督臣岑毓英先行據實覆

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

奏開礦事宜摺

奏爲滇省開礦事宜紳厥已有成效商股已有成
議人情踴躍可冀日起有功恭摺仰祈

聖鑒事竊照滇省地方五金並產向辦礦務富商樂
於從事貧民藉以謀生軍興以來商力民力均
不如前日形頹廢臣毓英於同治十三年內
奏請試辦上年續請招商集股與官本相輔而行
廣行開採光緒十年閏五月初二日欽奉

諭旨訓勉責成飭將近來採辦情形據實具奏所有

籌辦大略經臣凱嵩會摺覆陳並一面恭錄行知藩司暨礦務總局委員查辦去後茲據署藩司李德莪詳稱本省銅務自定章禁革使費豫借底本後紳民有利則趨招徠漸廣如迤東屬之湯丹茂麓等六正廠及十一子廠係委紳參將牟正昌游擊楊好謀蔣自萬貢生李恆芳等分認承辦迤西屬之迴龍得寶等八正廠及九小廠係委紳提督楊建勳副將熊明知州陸樹渠等分認承辦楚雄永北等廠係知府陳燦同

知姜瑞鴻督商開辦雲武屬之萬寶雙龍等廠
係紳士邵文藻王子猷分認承辦現復示諭紳
民如有訪出新礦無礙廬墓者准其報官請領
開山牌票任聽開採勢將接踵而來此紳廠已
有成效之情形也又據礦局委員鹽運使銜補
用知府全林績等稟稱上年奉委招集商本因
滬埠倒閉時日稍稽成議在先仍各照原稟措
辦查廣西候補知府張家齊候選通判關桐青
原認招股一百萬兩承辦永昌順甯兩府礦務

通判張長曜認招股六十萬兩承辦臨安開化
曲靖三府礦務江蘇道員胡家楨認招股一百
萬兩知府卓維芳認招股十五萬兩通判王熾
認赴川招股二十萬兩現經分催各將未解股
銀源源寄滇以便廣行開採卓維芳所購機器
現已運到東川銅廠應用至蒙自縣個舊錫廠
向係本省鑪戶採辦比歲滯銷現由全楸績於
招商項下籌本發給俾得盡力開煎其餘金銀
鉛鐵亦卽次第開採等情此商股已有成議之

情形也除將詳稟分別批飭務照指陳各節認真督率實力經營以期日起有功外臣等伏查礦務爲天地自然之利運京歲有定額抽課例有常經現在經理得人勢不難蒸蒸日上兼之礦苗豐旺貲本充盈砂丁雇用本省之民益以川黔之眾十數萬人隨時可以招集不惟攸關國計實亦有益民生臣等職任封圻分所應爲責無旁貸惟有因勢利導鼓舞商情現辦之區不准他人爭佔未開之礦聽由公舉承商庶幾紳富

聞風通力合作百廢具興藉可仰副

朝廷利用厚生之至意所有雲南現辦礦務人情踴

躍緣由謹合詞恭摺陳

奏伏乞

皇太后

皇上聖鑒訓示謹

奏

奏鹽務煎銷未暢請緩啓徵摺

奏爲滇鹽煎銷未暢養廉役食仍難依限啓徵援
案請緩以紓商力恭摺仰祈

聖鑒事竊照滇省鹽務自軍興後始因逆回盤踞繼

則武弁把持至同治十二年經臣毓英奏請委

員分投接辦自十三年起試辦三年儘徵儘解

嗣因三年限滿迭准部咨責令認額奏銷復經

前督撫臣奏准自光緒六年起先將正課二十

六萬餘兩照額徵收如有不敷在於鹽釐項下

撥補其應徵養廉役食銀十一萬餘兩准其緩徵三年至九年始卽行照額啓徵未屆限以前一切雜支暫准作正開銷等因咨行到滇當經檄飭遵照在案茲據鹽法道鍾念祖署布政使李德莪詳稱據各該井員等具稟滇省應徵養廉役食有關各項開銷該商等具有天良但使稍有餘力何敢不踴躍輸將無如自軍興以後人民未盡復業各屬鹽井當逆回盤踞之時燬壞過半樹木被伐殆盡竈戶煎鹽柴薪須赴鄰

境採買修井補樹所費不貲是以人皆觀望不
前經前各鹽道再三開導始肯承充然所招商
竈均非昔業鹺務之人於覓滷煎鹽之法多不
諳悉是以產鹽不能如昔之旺鹽務係計口授
食自地方迭遭蹂躪戶減丁稀以致鹽無銷路
卽課無來源兼之軍興後抽收鹽釐亦係取之
於鹽是今日之鹽釐卽昔日之雜款且加釐並
未加價商本實已非輕以現完課釐兩項併計
較承平時應完正雜課款不相上下前此責令

認完正課商力已形竭蹙若再加徵養廉役食
力更難支體察各屬煎銷情形均多阻滯幸有
鹽釐藉資挹注勉副三年奏銷現當三年限滿
迭據各商呈請緩徵倘必勉強從事則各商勢
將藉口成本過重私加賣價必致民有食貴之
虞更恐正雜同時虧欠徒迫追呼轉非核實辦
公之道似與體恤商民保全課款兩無濟益溯
查各省鹽務自軍務平定以後如閩浙兩淮等
處或改票運或抽釐稅均未能正雜一律啓徵

兩淮應徵雜款曾以鹽釐過重奏請緩徵聲明
俟鹽釐裁撤再行啓徵今滇省應徵養廉役食
亦在額課之外應徵雜款核與兩淮之案情事
相同且查滇省黑琅元永四井於光緒八年九
年內均被水災情形較重商民元氣大傷課無
起色加以迤南辦理防務而劉團之越鹽又浸
入開廣臨安等屬遽難禁止是以內地井鹽屯
聚商賈不能暢行銷路愈狹所有九年分各井
所徵鹽課不特正雜難以併徵而於應徵正課

尙不敷額迨辦理奏銷必須仍以鹽釐撥補方符六年奏准先復正額之案察看商力民情均屬拮据若再併徵雜款誠恐積欠愈多追繳更難再四思維惟有仍遵光緒六年奏案先儘正課徵解如有不敷在於鹽釐項下撥補足額其應徵養廉役食祇可援照兩淮成案請俟滇省善後蕝事或俟元氣大復前銷兩暢再議按年徵收俾示體恤至停緩以前應放一切雜支皆係緊要不能不放之款仍請照案在正課項下

核實開支等情會詳請

奏前來臣等查滇省地屬邊隅軍興後元氣大傷
戶減丁稀各井迭遭蹂躪近復連年水災涵源
受傷過甚况值迤南辦理防務商賈不能暢行
煎銷愈形疲滯當此課釐併徵成本已重再加
徵養廉役食商力實有未逮臣等職司鹺務當
此餉項奇絀之際苟能多徵一分卽多濟一分
之用何敢稍存諉延之見無如時艱所值強辦
爲難在部臣予限啓徵原屬正辦而臣等目擊

商艱委係實在情形合無仰懇

天恩俯念滇省鹽務煎紬銷滯民力未舒准如所擬
先儘正課徵收至養廉役食銀兩援照兩淮成
案俟善後蕝事鹽釐全裁煎銷暢旺再行酌量
啓徵其應需一切雜支仍就正課開除庶免虛
懸除咨部查照外謹合詞恭摺具陳伏乞

皇太后

皇上聖鑒訓示謹

奏

奏邊防孔亟需餉甚殷摺片

再滇省邊防孔亟需餉甚殷協餉解到無多地
丁鹽課而外猶恃釐金以資點綴前撫臣唐炯
任內

奏明減釐裁卡冀廣招徠旋准部文以不得因有
裁撤藉詞短徵臣莅任之初接見釐局司道皆
以釐金銳減爲言稟商覈辦臣維弊必去其太
甚法務取其相維辦釐章程要在無擾於民有
裨於餉如肩挑負販以落地爲名苛及纖細此

弊之必當革者一巡丁在外阻撻留難局員藉
名重罰肥已此弊之必當革者二因公舉而私
抽立內卡以重收層層剝削此弊之必當革者
三他如正卡之外間道或設分卡卡有兩途釐
祇一道又查卡向係驗票並不抽釐所以緝商
私而杜局弊也若概行裁撤商民惟利是視滇
省山徑紛歧勢必繞道而行相率趨避而尤慮
釐員卡役乘機賣放自便身圖收多報少藉口
於裁卡減釐抽收不旺是既滋商民之偷漏又

益以釐局之侵漁其弊將不可窮詰臣卷稽成

案何敢輕議更張昨咨商督臣會銜剴切出示
申言釐以濟餉商賈共顧時艱毋以繞越偷漏
爲得計並嚴飭各屬釐局務當潔已奉公認真
察弊如有藉詞諉飾虛報短徵查出卽行嚴叅
治罪仍一面檄飭釐局司道公同籌酌於舊章
之涉於繁瑣者刪除之新章之過於闕疎者規
畫之議詳覈辦期資挽救而裕供支是否有當
謹會同雲貴總督臣岑毓英附片具陳伏乞

聖鑒訓示謹

奏

籌擬滇省邊防摺

奏爲籌擬滇省邊防大略情形遵

旨先行密陳一面會商妥爲辦理恭摺仰祈

聖鑒事竊臣於光緒十年五月二十七日承准軍機

大臣字寄五月初八日奉

上諭周德潤奏滇粵當籌善後法人以保護中國邊境爲詞意欲借爲甌脫屯兵觀釁請於分界前先扼其要等語法越構衅現經李鴻章與法會議有簡明條款雖據聲稱不入雲南然此後滇粵邊境

均應豫爲布置以峻防閑廣西廣東水陸各隘究以何處爲最要雲南將來有邊外互市之事尤須扼定界限自固藩籬應如何駐紮重鎮增備船礮訓練營伍全在該督撫相度地勢先事綢繆著各就該省形勢切實籌畫奏明辦理如有周德潤陳奏所未及者該督撫當各抒所見竭力籌辦以臻周密原摺均著摘抄給與閱看將此由四百里諭知張樹聲岑毓英倪文蔚潘鼎新張凱嵩並諭令張之洞知之欽此欽遵寄信前來跪誦之餘仰見

聖主塵懷邊徼杜漸防微身任疆圻實深欽悚臣維
折衝禦侮在應變之多方固圉保民必經常以
定制雲南久經兵燹土曠人稀南路接壤越南
路徑分歧無險可扼近爲法人踞守並議與我
互市通商此後蹤跡往來事端交涉難保無意
外之虞臣莅任後逐日稽考輿圖權衡時局籌
所以捍衛防閑之法約有數端督臣岑毓英諳
習邊情統軍在外未及晤商又正值督防喫緊
之時善後事宜勢尚不遑酌議茲奉

諭飭各抒所見謹將籌擬大畧情形先爲

太后

皇上陳之一擬移鎮以重責成也開化臨安二府處
處與越南毘連向有開化臨元兩鎮分駐惟臨
安屬之蒙自縣距郡三程首當衝要城內僅一
知縣一都司不足以資鎮壓擬應將臨元鎮總
兵移駐蒙自建立衙署酌增兵額整齊軍實再
撥練軍一二營隸之務使練成勁旅緩急可資
仍令每季出巡邊隘與開化鎮總兵會哨一次

以臻周密一擬屯田以謀久遠也滇防非一時
可了大軍久駐則餉無從籌鄉團難齊且力不
足恃計惟有仿古屯田之法擬於兩郡各隘要
招集土住貧民撥地開墾編查戶口人丁予以
農器籽種令地方文員經理之另於候補武職
中遴選都守等官分充各屯教習編爲隊伍授
以技藝土民能耐勞苦不畏煙瘴道路熟習扒
山踰澗是其所長訓練成軍必能得力一擬建
設礮卡以資巡防也礮礮不毛之士常數十里

無人烟故欲防奸必須守險擬凡往來要路地勢偏仄嶽崎不能方軌並騎者扼設二三碉樓作品字形或連珠形內藏子藥米薪外積滾木礮石以勇幹武弁帶兵數十名守之另於數里十數里外最高處聯絡設卡每卡以五兵守之遇警晝則搖旗夜則放礮準備攻擊建設處所應由兩鎮臣相度佈置弁兵亦由兩鎮隨時抽撥換防以固門戶一擬練習刀矛而利掩擊也近時專尙火攻而器之利鈍旣殊手之生熟亦

異以我所短攻人所長殊無把握况滇邊徑曲
山多亦不能專恃火器擬挑派教習而選標兵
練軍屯勇之趨捷者練習刀矛及跳擲擊刺之
法既能增長勇力亦可開拓膽智如遇對敵不
拘隊伍但聽號令埋伏齊出盪決縱橫施之於
狹路之中夤夜之際尤可制勝出奇似亦舍短
用長之一法也以上四事就臣一得之愚籌擬
大畧此外如廣設探報修復邊關豎立界碑堵
塞僻徑均應及時舉辦而最要者尤在沿邊郡

邑營汎委任得人文員必克勤吏事深得民心
武職必樸實不欺謀勇兼具者爲之乃能鼓舞
衆志先聲奪人督臣在滇年深周知灼見臣當
隨時商確慎選邊材以供臂指至禦外必先靖
內固本乃可祛邪物先腐而蟲生越南徧地教
民以致表裏爲奸可爲殷鑒滇邊尙未聞此臣
已密飭邊郡守令乘未經互市以前不動聲色
傳集公正能事紳耆各誠其鄉居民曉以是非
喻以禍福斷不許一人從教如能辦理得法日

久著效卽錄該官紳之功歸入邊防請獎臣智
慮短淺愚昧之見是否有當謹遵
旨先行繕摺密陳伏乞

皇太后

皇上聖鑒訓示謹

奏

遵 旨保薦人才摺

奏爲遵

旨保薦人才以備任使恭摺仰祈

聖鑒事竊臣准吏部咨光緒十年五月十七日奉

上諭爲政以得人爲先疊經中外臣工遵旨保薦人
才均已陸續存記其中不乏可用之人而濫竽充
數亦所不免選擇而使其難其慎因思一時之才
自足供一時之用仍恐搜羅不廣鑒識不精致使
眞才伏處山林或屈抑下僚不能以時上達著大

學士六部九卿各直省將軍督撫再行奏保欽此
跪誦之下欽悚交深臣維位事惟能庶艱難之
共濟知人不易期名實之相符自愧衰庸敢不
秉公訪求仰副以人事

君之義顧念臣莅滇未久閱歷短淺考覈難周茲查
有二品銜廣西補用道蔣澤春咸豐初偕其堂
弟原任廣東巡撫蔣益澧統帶湘軍入粵援剿
屢立戰功臣巡撫廣西時派令督辦容縣岑溪
軍務所至皆捷全股蕩平同治四年隨臣攻剿

南甯府山澤老巢搗穴擒渠始終其事該員沈毅精敏治軍嚴整每戰身先曾任柳州府知府署理右江道篆居官以廉幹稱現聞總理廣西練軍營務實於吏治武備措理裕如堪以保薦又四川巴縣知縣國璋爲政廉明百廢具舉理煩治劇識量恢宏臣今春赴黔道經重慶該管道府亟稱其賢行其境內保甲團練最爲整齊士民均極愛戴洵屬體用兼備似非百里之才堪以保薦以上二員臣在廣西巡撫四川藩司

任內具有見聞澄心審察仰承

諭飭敬舉所知斷不敢徒採虛聲濫竽充數所有遵
旨保薦人才緣由謹恭摺具陳伏乞

皇太后

皇上聖鑒訓示謹

奏

奏動撥存款摺

奏爲邊饗待支迫切請動用另款存儲銀兩以濟
急需恭摺仰祈

聖鑒事竊照本年春間滇軍需饗孔殷奉

旨敕部籌撥銀一百萬兩以利軍行嗣督臣退守滇

邊裁併勇營請以撥饗仍舊解京以重根本奉

旨戶部知道欽此旋准部咨令以各省關已經解滇

銀二十二萬兩另款存儲俟有緊急要需報明

再行動用在案當督臣裁營節饗之時甫旬日

而法人進窺保勝圖逐劉團邊警頻聞舊軍重
集所需餽項祇得於庫存銅本動挪經臣附片
奏陳並請

敕部分催增撥協滇新餽及常月各餽以裕供支
滇處邊陲各省解濟需時難資緩急督臣近奉
諭旨於七月十二日由馬白關起程統軍出境舊餽
須照數補給新餽應按時開支待支實爲迫切
督臣外覩諸軍之困苦內審餽項之艱難每深
顧慮臣時艱共濟蒞任以後日惟清惟正之供

追有著之款裁無益之費罷不急之工不能大有補益司庫惟餘銅本一項無論現當整頓銅務之際採辦京運係屬要需卽令竭澤而漁亦復涸可立待籌維再四惟有陳懇

天恩俯准將各省關已解至滇起解在途之前項鑲銀二十二萬兩悉數動用以紓眉急庶以後新撥及常月各饗源源解到得以挪移接濟鼓舞軍心所有請動另款存儲銀兩以濟急需緣由

謹會同雲貴總督臣岑毓英恭摺陳

奏伏乞

皇太后

皇上聖鑒訓示謹

奏

請勸捐濟餉摺

奏爲關外戎機孔迫軍食維艱擬請廣勸捐輸設局趕收糧米以裕輓運而安軍心恭摺仰祈

聖鑒事竊照滇軍赴邊近時饟固奇絀而缺糧爲尤

甚臣毓英出關之始糧由越南地方購買嗣因

道路阻塞田土荒蕪無從採辦改由內地開化

臨安一帶運米出邊已形煩費迨後米價翔貴

商販不前不得已動用社倉餘穀節節支持然

防軍一萬餘人日需米京石百數十石有奇眾

口嗷嗷勢將不繼若由省城運千里齎糧士
有飢色既難按時接濟且運費必較買價尤昂
會辦軍務提臣鮑超所部轉瞬來滇需糧更鉅
雖隨營有自備之饜而就地無可購之糧凡人
日不再食則饑凡軍一日無糧則潰臣等念此
寢食難安往復函商別無善策臣凱嵩連日督
同司道再四籌度惟有暫援常例就地捐收米
石庶期馬騰士飽軍食無虞擬設局臨安開化
荊城遴委廉幹之員專司其事無論本省外省

士庶總以實米自行運局米照市價作銀按合
例銀上兌臣等明知停捐爲

朝廷美政何敢復請重開惟常例捐輸非同籌餉
原不在奏停之列現直隸山東湖北等省或捐
辦軍火或藉資賑濟以滇省邊務之重事勢之
迫迨不啻數倍過之邊隅瘠苦之區苟非予以
章服之榮必難動其急公之念臣等意在贍軍
紓患非敢輕議更張也至此次原專爲收米解
營勢難由部庫上兌並擬請將向不准由外局

報捐之加級紀錄及免保舉試俸等項均暫准
滇局收捐以廣招徠餘俱照直隸章程辦理並
嚴禁折扣及收多報少用少報多等弊一俟邊
務撤防之日立即截止撤局奏報斷不敢稍任
遷延如蒙

俞允仰懇

敕部將常行捐例及直隸章程迅速頒發來滇再行
核定一切事宜具奏辦理臣等爲邊軍乏糧起
見毋任迫切悚惶待

命之至謹合詞恭摺馳陳伏乞

皇太后

皇上聖鑒訓示謹

奏

奏普洱府地震摺

奏爲普洱府城連日地震委員馳往查勘賑卹先
將大概情形恭摺具陳仰祈

聖鑒事竊據迤南道陳廷珍會同署普洱鎮馬忠稟
報普洱地方本年暘雨應時歲稱中稔詎立冬
後陰雨連綿山水陡發九月二十七日辰刻突
聞聲如殷雷自北而南城內外地忽大震逾半
刻之久始定民房坍塌無數幸白晝易於趨避
計壓斃丁口八命受傷者八九十人所有城垣

廟宇衙署藥局縣監均皆損壞瓦礫盈途聞石
膏磨黑二井暨近城鄉村同時被災有無損傷
丁口傾圮房屋尙未據報連日地仍搖動較前
稍輕民皆露宿飢寒交迫情實可矜現在量予
賑濟等情臣接稟後卽日集商司道遴委辦事
廉幹之候補知縣陳清昌齎銀一千兩兼程馳
往會同府縣察勘賑卹去後竊維滇民迭經兵
燹困苦異常茲復罹此奇災皆由臣等政治不
修奉職無狀以致

上蒼示儆悚惕滋深惟有身率各官虔誠修省以期
感召休祥除俟委員勘報實在情形分別災傷
輕重妥爲賑卹務期實惠均霑毋任一夫失所
其鹽井會否被震四鄉是否成災並城垣衙署
應作何修復之處查明再行核辦外所有普洱
府城連日地震現經委勘賑卹大概情形謹會
同雲貴督臣岑毓英恭摺馳陳伏乞

皇太后

皇上聖鑒訓示謹

撫滇奏疏卷一

五

益

齋

奏

奏夷獫滋事摺片

再滇省漢夷雜處種類紛繁獷悍桀驁太羊成性臣到任切諭地方官吏整齊團練撫馭蠻夷加意鈐束羈縻稍知斂戢乃昨據順甯協副將岑有富順甯府知府周範署緬甯通判張恩洪稟報有獫黑頭目張秉藎勾結蠻眾千餘攻破猛猛土巡檢所屬圍控地方乘勢奪踞三十餘寨焚擄劫殺意在蠶食日益披猖請兵剿辦前來又據署武定營叅將李文高武定州知州興

祿署祿勸縣知縣甘棠茂稟報縣屬半果馬夷族革生張大川素性兇狡近糾眾一千餘人分紮營壘圍殺土司拔貢魯大宗之母魯李氏身死並殺斃數十命負嵎抗官該州營已帶兵團前往查辦等情臣查獮目張秉藿前與猛猛土司爭佔地土連歲構兵經委員查勘分界於九年始行結案轉瞬又復恃強倡亂荼毒一方至革生張大川係因其父張秉恆霸佔土目魯姓田產互鬪挾嫌嗣其父爲傭工所殺復控魯金

等姓主謀魯李氏赴京呈控奉

旨交審迭經催提抗不到案茲復聚眾圍攻慘殺原
告多命均屬形同叛逆罪不容誅夷性兇殘憑
恃天險習聞邊防緊迫饒需不繼兵力難分故
敢恣肆橫行悍然無所忌憚臣與藩司剛毅等
密計操之過急固慮激成事端若隱忍遷延溫
言解散未經懲創彼必不遵且其地一近緬夷
一連川界尤恐句誘日眾星火燎原甚至蠻夷
羣相效尤關繫殊非淺鮮臣現飭司道勉籌經

費於緬甯一路密檄副將岑有富選帶弁兵馳往祿勸一路遴委籍隸該縣之署督標左營游擊蔣世恩及候補副將錢之福酌帶操兵馳往姑以彈壓爲名密授機宜令各會同文員集紳調練跣實路徑設閒出奇窺便用鵬剿之法務期不動聲色搗穴擒渠以除巨患仍先發給寬免脅從告示以安人心除剿捕情形隨時馳報外所有籌辦夷獠聚眾滋事緣由理合會同雲貴總督臣岑毓英附片具陳伏乞

聖鑒訓示謹

奏

撫滇奏疏卷一

三

益

齋

--	--	--	--	--	--	--	--	--	--

奏辦教堂滋事摺片

再滇省各屬教堂從教者多係川民倚教橫行
欺凌土著道路以目時滋事端前年浪穹縣之
案其尤甚者也近因法人渝盟肇衅欽奉

諭旨以法國官商教民有願畱內地者一律保護軍
民人等倘有藉端滋擾情事嚴拏正法等因臣欽
遵恭錄出示曉諭復恐民教誤會致生疑忌並
檄屬督飭紳耆逐細宣講所在安靜如常惟據
永北廳文武稟報該屬舊衙坪教堂司鐸艾若

瑟素與地方不和從教者又多兇橫每以法擾
閩海情形誇張於市眾皆嫉之及見恭錄

諭旨告示內不自安自九月十八日以後廣購軍火
米糧招集夷裸民人疑有異謀紛紛遷徙適有
童饒二姓悔教出首人心更爲惶惑等情臣立
卽繕示曉諭飛飭該文武趕往彈壓鎮撫去後
旋據續稟該處民教彼此猜疑晝夜警備該司
鐸慮櫻眾怒於二十八日寅刻統率教眾擁出
居民見教堂火起一路喊殺而來倉卒出禦互

有傷亡教眾卽由夷寨繞出江外赴川境之紅
土苴而去該廳營趕到查勘教堂前層燒燬正
房兩廂尙存教民屍身各有洋印號片銅碼洋
槍分別掩埋存案教民家口妥爲安置毋許藉
擾地方現已安定等情臣查此案據該廳文武
前後稟稱實由教堂肇衅究竟有無別故及藉
端生事之人仍飭確切查明稟覆已斃屍身民
教實各若干人仍飭驗明填格詳送未燬教堂
房屋仍飭封閉看守司鐸艾若瑟現旣入川應

咨川轉飭鹽源縣傳知該縣教堂照管毋任回
滇復生枝節除咨會四川督臣查照並通飭凡
有教堂之地方文武加意鈐束務使民教相安
外所有永北廳教堂滋事現已安靜仍籌善後
情形謹會同雲貴督臣岑毓英附片馳陳伏乞

聖鑒訓示謹

奏

奏鮑軍設局轉運摺片

再臣正繕摺間承准軍機大臣字寄光緒十年

十月二十日奉

上諭鮑超奏請在川黔等處設局轉運等語轉運餉
械誠軍中要務著丁寶楨岑毓英張凱嵩李用濟
督飭沿途經過地方官妥爲轉運毋稍遲延該提
督所請設局之處著毋庸議並著嚴飭管哨各官
認真約束勇丁如有騷擾情事惟該提督是問等
因欽此臣跪誦之餘仰見

聖主塵懷邊務用利軍行至意遵卽恭錄轉行司道
籌辦去後伏查滇省地瘠民貧上年經督撫臣
奏明永裁夫馬二百餘年之積累悉與蠲除而州
縣廉俸無多力難自贍勢不能責令賠貼嗣是
凡遇學差試差文武舉人馳驛委員奉差出省
一切夫馬往來概由善後局權宜籌發用實難
省例不准銷臣到任心知其非補苴乏術本年
軍務喫緊協饟罕至庫局羅掘攢湊悉索以供
關外軍饟軍糧而運送糧餼礮械需用夫馬甚

繁民多居奇必重價始能應募辦理十分掣肘
今轉運霆軍饟械分所應爲惟查由宣威入滇
以至關外大營計程約三十站所費甚鉅現值
饑需匱竭不無顧此失彼之虞臣惟有督同籌
畫覈實供支以期勿誤再臣恭釋

諭旨以設局糜費滋多改由沿途轉運自係專指陸
續解營饟械而言其各營入境時隨帶軍裝什
物自有長夫不在此例臣連日與善後局司道
悉心酌訂卽查照現辦章程慎選諳練委員領

齋經費前往首站宣威州守候遇有上站解到
霆軍餽械立即秤明劬重配搭馱腳人夫源源
轉運不准稍事延擱亦不得違例濫支以重軍
務謹會同雲貴督臣岑毓英附片覆陳是否有
當伏乞

聖鑒訓示謹

奏

撫滇奏疏卷一終

男

季煜
仲所
景藩
季煌

孫善培校字

撫滇奏疏卷二

圍勦祿勸夷匪摺

奏爲兵團圍勦祿勸夷匪已將首夥擒斬驅除地方一律安靜恭摺仰祈

聖鑒事竊照祿勸縣夷族革生張大川素性兇橫頻年焚掠前因土婦魯李氏京控抗不到案復糾

衆千餘攻殺魯李氏等多命荼營負固聲勢孔

張臣接據稟報當派候補副將錢之福馳往會

同地方文武設法查拏續委籍隸祿勸之署督

標右營遊擊蔣世恩管帶省城操兵面授機宜
飭往添調紳團密謀鵬勦俾免滋蔓難圖當將
大概情形附片

奏明在案疊據武定直隸州知州興祿署武定營
參將李文高稟稱於九月十九日會督副將錢
之福及署祿勸縣知縣甘棠茂抵馬鹿塘駐紮
偪進半果馬賊營遴派正紳單騎直入其巢宣
諭解散張大川負嵎擁衆招之不來誘之不出
興祿等以該匪首狡而多謀恃谿崗爲奧援驅

土民若奴隸附和之輩多係脅從乃徧張告示諭以禍福曉以順逆令各自拔來歸其衆憑藉官威乃相與紛紛散匿張大川仍聚有死黨數百人挖路建碣爲拒敵計並揚言糾約川境蠻匪來助興祿急調團扼其後路以斷外援適蔣世恩趕至兵力旣厚團衆齊來遂議於十月十四日分道進攻辰刻興祿李文高軍入谷口匪黨已掩殺而來勢頗猖獗我軍屹立不動純以洋槍向擊斃匪甚多兵團受傷六人鏖戰半日

匪目張常齡領衆拚死直前我軍埋伏四起立擒十餘人知張常齡係手刃魯李氏首犯隨即斬於陣前餘匪氣奪狂奔蔣世恩錢之福正由別路抄來乘勢合軍追殺直抵安來村巢穴匪已翻山逃竄擒獲張大川家屬四名口起獲大礮五位火藥七百斤槍械一百餘件探得該匪四散竄伏山深箐密不得確蹤乃分兵連日搜山各有斬獲所遇營寨礮卡悉行平毀興祿等勦撫兼施投首者悉免其罪至二十四夜首民

鍾黑皮等密報匪黨數十人潛聚三腳半地方
該處險峻異常人跡罕到乃嚮導官軍四面合
圍匪衆據險猶復悉力相持二十六日寅刻該
文武等鼓勵奮勇兵團捫葛攀藤鼓譟直上槍
斃匪弟張阿皮等數人餘匪駭散墮澗滾崖罕
得脫者匪首張大川身受槍傷甚重立時就擒
解經興祿驗明就地正法梟示受害民人無不
稱快地方現已一律安靜據該州縣營委各員
會稟前來

臣

查匪首張大川與其故父張秉恆

本由逆匪投誠陰鷙獷悍夷性好殺焚掠屠戮
視爲固然鄉民無不切齒其所居之半果馬地
險路歧與川省蠻夷毗近結交甚廣膽志日張
稔知大軍出關饒需不繼兵力難分故敢聚衆
紮營抗官拒敵實爲省門切近之憂臣與藩司
剛毅等密籌力圖擒捕靖此一方茲幸文武紳
團恪遵指授將要匪迅速殲除不致釀成巨患
其在事出力官紳可否容臣擇尤酌保數員以
示鼓勵之處出自

天恩除將善後事宜督飭妥辦並催提京控人証解
省訊結外所有祿勸夷匪現經兵團勦除地方
一律安靜緣由謹會同雲貴總督臣岑毓英恭
摺具陳伏乞

皇太后

皇上聖鑒訓示謹

奏

--	--	--	--	--	--	--	--	--	--

夷匪原委摺片

再祿勸縣八馬地方土夷雜處魯金張三姓挾嫌焚殺垂三十年良善多被摧殘強梁各分黨與軍興日久鈐制未遑姑以空文彈壓而已

臣

辦理此案詳稽卷牘構亂之由皆因財產先是半果馬土目魯國治身故無嗣僅遺魯張氏係其外居之妾有子大權族衆皆謂非土目所出張秉恆素稱強霸助大權佔奪土田而陰分其利糾衆抄殺無惡不爲魯李氏者乃國治已故

堂弟國賢之妻也亦無子私繼拔貢魯大宗爲嗣又以魯坤芳承繼國治要皆無服族人並不同居意在藉繼爭產張秉恆與大權攻逐李氏依其壻金阿皮居住大權旋因案伏誅張秉恆因起逐魯全佔之謀遂並掠金姓等村頻年互相仇殺光緒六年經該前州劉毓珂親往查辦權宜斷結以半果馬之租歸張氏另將已當之業找賣收銀置租爲李氏養贍不准再去半果馬滋事迨八年内張秉恆爲其傭工所殺已獲

正兇張大川疑係魯金兩姓主使重釀兵端此
三姓互鬪之大略情形也查該夷等性本犬羊
習於爭鬪有土衆以供其驅使結蠻匪以廣其
聲援現張秉恆與其子大川雖故仇無可結而
產仍有爭此次李氏之死卽因霸收張氏之租
以致起衅魯大宗等亦非純善若不趁此籌辦
尙非一勞永逸之圖該州興祿來省臣見其情
形熟習辦事勤能詢以彼地應如何善後據稱
該三姓爭殺地方連年受害久有改土歸流之

議此次亦曾赴州具呈欲絕患根非此無策

臣

察所稟似尙有見惟事體繁重仍當就地妥籌
因卽行司委員會同該州前往傳集紳耆體察
酌辦並將張大川父子侵佔田地清還原主其
本己家產仍歸其弟張藥力收管羈留州城居
住以杜後衅除俟州委稟至再行妥酌辦理外

所有此案原委及現籌善後大概情形謹會同

雲貴總督

臣

岑毓英附片陳明伏乞

聖鑒訓示謹

奏

撫滇奏稿

卷二

七

益

齋

懲辦迤東匪犯摺片

再滇省迤東一帶緊接川黔時有匪徒入境生
事查上年十月宣威州色空地地方有川省道人
劉停見妄言禍福以幻術煽惑愚民且私刻僞
印約眾起事經該州文武訪聞並據被惑民人
赴州投首當將該犯拏獲解省提訊供詞旋認
旋翻又復在監患病昨據醫痊由司定擬具詳
前來臣親提研訊驗明私刻僞印據供認邪言
煽惑各情不諱查滇本邊陲復當防務吃緊遊

勇散練所在甚多人心最易搖動似此邪言惑
眾之僧道豈能以謀叛未成任其狡展稍事拘
泥當經批飭將該犯照懲辦土匪章程卽行正
法除出示敘錄情罪並飭傳首犯事地方示眾
俾昭炯戒外所有懲辦匪犯緣由謹會同雲貴
總督臣岑毓英附片陳明伏乞

聖鑒謹

奏

籌防緬匪摺片

再緬國之新街距滇省騰越廳計程七站本年春間因猛拱等匪蠡起新街戒嚴旋幸剿潰前經_臣覆陳在案茲據騰越文武稟報猛拱逃匪金國玉勾結野山夷匪於十月二十三日攻破新街商民多被焚掠惟英美等國公寓教堂均未擾害現在緬官逃出請兵剿捕等情_臣查金國玉本係積匪現將新街攻破屯踞裏脇聲勢日張若該國力不能除必至養成癰患若被剿

窮蹙又恐其依附沿邊野夷竄近內地則騰越

龍陵一帶在在須防現經鎮臣張松林派令游

擊譚美管帶正右營練軍扼紫邊要該廳團練

聞尙可用臣復檄飭署同知吳晴琦馳往偵探

情形督率嚴防以助兵力並飭各屬激厲土司

一體堵禦仍函商督臣如果情形緊急再行抽

調勇營趕往援應以保無虞所有籌防緬匪情

形謹會同雲貴督臣岑毓英附片具陳伏乞

聖鑒訓示謹

奏

撫滇奏疏卷二

十

益

齋

--	--	--	--	--	--	--	--	--	--

籌維滇省大局防閑教民四條摺

條陳附

奏爲籌維滇省大局預事防閑恭摺密陳仰祈

聖鑒事竊滇省自經兵燹痛鉅創深民多思治

臣

茲

任九月訪詢利病懲勸交施察看吏治漸修盜

風稍戢勢豪功職頓化其囂陵游勇奸民罕聞

其搯索以故大軍遠出外而羽檄紛馳內而轉

輸不絕民情安堵若無事然惟是民教猜嫌煩

言嘖嘖蓋以法人圖越全恃教黨爲奧援實爲

殷鑒滇民風尙敬祖崇儒罕爲所惑其從教者

率係外省客民蠻夷種類隱然別樹一幟與居民積不相能時形齟齬秋間永北廳民教互鬪之案雖經臣嚴飭地方文武解散並責成凡有教民之處一律彈壓稽查而士民讜言迄未止息此誠可爲隱憂也查天主教始於前明自利瑪竇南懷仁傳習後祇以勸善爲事今則中外和好弛禁有年其傳日廣

朝廷知海內之大讀書明理者必不入其彀中不過愚拙之人沈溺其說以禮拜爲求福之資無害

於政治果仍安分耕鑿並不作奸犯科何庸歧
視無如該教民等恃有護符同處一鄉儼若敵
國彼此猜忌日深語云明者治疾於未發智者
防患於無形未雨綢繆敢沾沾爲目前計耶臣
計法人踞越未暇窺滇且滇越之交冬春永涸
小輪船亦不能行夏秋瘴癘大興中之輒斃誠
天之所以限中外也卽令有警滇省地險可扼
民志尙堅主客之勢旣殊眾寡之數亦異殊不
足慮所慮者夷性狡而謀深用其故智藉名傳

教勸善數年之後漸染日深以彼腹心居我肘
腋此則事之必當早計者臣忝膺疆寄昕夕籌
維除前經密飭邊界之開化臨安廣南三府官
紳熟思審處及時固結民心外現復酌議四條
爲亡羊補牢之思期慎防閑而資鈴制事關大
局以臣識見拘墟未敢擅便謹繕具清單恭呈
御覽是否有當仰懇

天恩敕下總理衙門議覆施行所有籌維滇省大局
緣由理合專摺密呈請

旨伏乞

皇太后

皇上聖鑒訓示謹

奏

The image shows a large, empty table with 10 columns and a header row. The table is oriented vertically on the page. The header row is located at the top of the table, and the remaining 9 rows are empty. The table is enclosed in a thick black border. On the right side of the table, there are two small rectangular tabs or handles, one near the top and one near the bottom.

謹將現擬防閑教民四條恭呈

御覽

計開

一另編保甲以資防維也滇省舉行保甲以禦外侮以清內奸獨教民不受編查謂祇服教堂管轄民視爲異類而屏除之官見其崛彊而亦姑置之此日離之勢也今擬令有教民之處無論羣居雜處均另編一保甲冊選其中之老成曉事家有恆產者委充保長甲長給以印諭使

之稽查其各戶丁口若干係何籍貫作何生理
概於冊內註明繳官備查其地方賽會迎神固
不與教民相涉遇有防剿守望等事仍由保長
甲長率領從公不得護抗倘有犯法行兇者卽
責成保長送官似亦鈐制之一法也

一禁藏軍火以釋猜忌也民間私藏軍器向干
例禁團防器械率係刀矛及防獸鎗銃而已聞
教民多蓄洋鎗火藥並挂洋人號片地方官從
不過問民多忌之夫傳教意主勸善何爲蓄此

利器爲人藉口乎今擬曉示習教之民各安本業無拂眾情並申明例禁嗣後勿許私藏軍火違者提拏治罪保甲頭人隱匿不報者分別究治仍飭行各屬先行知照教堂司鐸一體查禁庶民教猜忌自釋矣

一釐正學校以端趨嚮也文武兩試取士以供國家之用也習教者非言孔孟剽竊二氏之糟粕而飾以浮誕之說幾欲援儒爲墨稍知道義者無不非之然亦間有應文武試者士子不屑與

之同儕往往阻考嘖有煩言臣擬明定章程該
民既願習教自非功名仕宦人中應不准入考
場致生事故諭飭教官廩保凡考試保結中須
註明並未習教字樣以嚴登進而端趨嚮其先
會習教旋復改悔者仍准應試庶求榮者不至
失足卽傳教者亦無可置喙矣

一區別昏姻以弭嫌隙也民間嫁娶關係終身
今乃有聘字在先後經入教者男女二姓遂至
厭薄鄙夷逼娶悔昏因爭涉訟其無識者聯姻

而後互相煽誘入主出奴尤世道人心之患也
查滇省習教者不過百之二三耳及今圖之猶
未爲晚臣擬明懸教令嗣後教民祇許與教民
結姻服食起居自適其便凡士民家不得相與
匹配否則以嫁娶違

制論使之內愧而勢亦孤或亦清源塞流之一法臣
體察輿情默籌補救非敢操之過急實慮其久
則難圖也

--	--	--	--	--	--	--	--	--	--

奏謝 頒賜

穆宗毅皇帝聖訓全部摺

奏爲恭謝

天恩事竊臣齋捐差回敬捧

恩頒

穆宗毅皇帝聖訓全部臣當卽恭設香案望

闕叩頭祇領欽惟

穆宗毅皇帝敕幾兢業一十三年比戶又安國萬餘里

恢一代承平之業

撫滇奏疏卷二

七

益

齋

成千秋炳煥之章

聖政昭垂統中外而咸欽

誥誠

德音洋溢視典謨而益著光華我

皇上繼述丕圖繼承

至道

命史臣而詳纂搜羅經

乙覽之勤合疆吏以祇承

錫予勵寅清之志臣濫竽滋懼窺管懷慚聆

綸綍之敷宜增冰淵之儆惕服膺勿失越十年而仍戴
生成供職維虔仰

九陛而冀酬

恩眷所有

微臣

感激下忱謹繕摺恭謝

天恩伏乞

皇上聖鑒謹

奏

--	--	--	--	--	--	--	--	--	--	--

奏緬匪滋事摺

奏爲查明緬匪滋事詳確情形恭摺覆陳仰祈

聖鑒事竊

臣

於光緒十一年正月初一日承准軍機

大臣字寄十年十二月十四日奉

上諭會紀澤電奏緬王昏國亂有華人據入募城儻
雲官派去固宜商英廷儻係亂民似宜招降該華
人用拓雲界據通海之江以固圉而防患拓界事
亦宜早商英廷等語前據唐炯張凱嵩先後具奏
緬匪滋事被剿敗潰仍飭沿邊地方官團結民練

聯絡野人嚴加防範茲據會紀澤所奏各情是否仍係此股緬匪滋擾抑另有在緬華人糾眾據城之事著岑毓英張凱嵩迅速查明詳確情形卽行奏聞並將該侍郎所奏妥慎籌畫一面督飭沿邊地方文武嚴密籌防以固邊圉不得稍涉大意致啟邊衅將此由六百里各諭令知之欽此臣查此股匪首金綢玉本係華人久居緬地上年被剿敗潰與其黨竄伏猛拱地方緬不設防致復有新街之失查新街設立木寨並無城垣未聞另

有在緬華人佔據八募城之事臣前據稟報曾將籌防情形於上年十二月二十日會同督臣奏陳在案續據騰越鎮張松林署該廳同知吳晴琦咨稟新街之匪經緬將瑞蘭波力攻未下近接緬官稟以該匪首屯踞新街揚言係奉華官所委其國王固不深信惟祈垂憐相助協攻等語該鎮廳發給回文告示俾釋羣疑勉令奮力圍攻我軍現駐蠻允必爲兜捕去後復會稱緬兵弱而賊強恐難撲滅查有署鎮標中營遊擊

李珍國生長緬地威信素孚擬請飭帶士練數百名入緬剿辦可期克捷臣以事關域外未請旨豈能進兵且以數百人遠涉緬疆殊無把握其地又緬洋雜處尤慮啟衅生端仍令厚集兵團擇要嚴密扼防以固邊圉覆思該鎮廳所陳意在解緬人之疑竇紓滇省之邊防亦非無見惟李珍國臣未識面如果緬匪負固該遊擊越境援剿應否准行已咨商督臣籌酌核辦俟商定另行會奏再滇省自騰越廳城以南三百五里至

蠻允爲滇界由蠻允至緬之新街計二百八十五里其間一百六十五里爲野人界向無管轄曾紀澤所奏拓界一節審時度勢窒礙難行合併陳明謹將查明緬匪確情並籌防緣由遵

旨先行由驛覆

奏伏乞

皇太后

皇上聖鑒訓示謹

奏

--	--	--	--	--	--	--	--	--	--

報緬匪勦平摺片

再緬匪金幟玉佔踞新街騰越兵團扼防邊界
並擬請入緬援勦情形經臣先後陳

奏在案續據署騰越同知吳晴琦兩次稟報該匪
因內地嚴堵緬兵圍攻拚死相持吳晴琦以緬
官迭稟乞援兵難越境當與鎮臣張松林博採
羣言查有在緬華人曾充練目之宋體正果敢
可用密給賞格諭令計斬渠魁立賞銀五百兩
緬將瑞蘭波聞之復許加賞令宋體正率同楊

有才等詐投賊中乘機計取上年十二月二十一日緬兵攻破附近新街之姐英寨二十三日復破賊於曾卜雅地方斬獲甚眾匪黨多散去者正月初六日寅刻緬將密約內應鼓譟環攻宋體正乘亂突將金幘玉砍殺楊有才等亦鎗斃悍黨多名羣賊奪路奔逃悉經緬將督兵截殺當將新街收復安撫脅從金幘玉首級驗明竿示等情並據騰越鎮永昌府咨稟前來臣查緬兵積弱易啓戎心此次金幘玉擁眾千餘詭

稱華官所派佔踞新街七十餘日該鎮廳前請
以遊擊李珍國帶練赴援原爲釋疑捍患茲幸
天威遠播全股蕩平駐邊兵團臣令照舊巡防毋致
餘匪竄逸並轉飭緬官清查善後務淨根株至
該鎮廳辦理此案疊次寄字緬官捐募內應意
在解猜嫌而弭外釁速勦捕以固邊防籌辦尙
爲得法可否俟撤防之後容臣確切覆查量予
奏獎以爲邊吏能事者勸出自

天恩所有據報緬匪勦平情形謹會同雲貴總督臣

皇太后

岑毓英附片具陳伏乞

皇上聖鑒訓示謹

奏

報霽軍抵滇省摺片

再會辦雲南軍務前湖南提督臣鮑超統軍入
滇日期曾經臣陳

奏在案該提督於正月十二日行抵省城因軍餉
缺乏自向商號挪借散放諸軍於二十二日親
率前進其後到各營陸續到省至二月初六日
概已起行此次軍行之處現經臣嚴飭沿途州
縣設局預備薪米油鹽聽其購買該弁勇等公
平給價秋毫無犯耕市不驚道路聚觀皆稱其

紀律嚴明爲從來所未有臣親至各營察看實屬部伍整齊一律精壯堪以仰慰

宸廑理合附片具陳伏乞

聖鑒謹

奏

奏關外需餉摺

奏爲關外軍務喫緊需饟益迫籌饟益艱庫局無可搜羅勉向商號挪貸恭摺仰祈

聖鑒事竊照滇軍久駐越南力圖進取招募日眾月需的饟十三萬兩解濟大營督臣身在軍中望饟迫切分應由臣督飭司道寬爲籌畫接濟源源俾無缺乏奈庫儲已竭協饟罕來上年幸尙無誤供支本年籌無可籌不得已向商號挪貸脅焦舌敝殊難習以爲常臣日夕徬徨寢食幾

廢茲據藩司剛毅暨善後局司道會詳遵查滇省歲入之項約計五十餘萬兩應支各款則需九十餘萬兩不敷之數向賴各省協撥勉強支撐其關外大軍需饟尤鉅前蒙部撥四川湖北湖南河南江西浙江江蘇等省按月籌解銀十六萬兩連原定協饟四萬兩合計每月共撥銀二十萬兩如果悉數解到則內而歲支外而邊饟原可敷用無如所撥惟四川一省尙能按時解濟其餘各省迄無認解明文亦無起解消息

入春以來仰屋興嗟至廣東所借洋款議撥滇軍四十萬兩滙解需時難資急用邊務現需月饟十三萬兩防剿喫緊待哺嗷嗷不得已傳集省城西商認息挪貸准於洋款邊饟滙項下扣收現已借用銀二十七萬兩懸欠日重掣肘堪虞此外捐例雖開地瘠民貧無人過問釐金減色鹽課蕭條又復無從周轉銅本有關京運本應另款存儲近年遇急動挪所存將罄通籌全局實屬萬難支持惟查各省欠解協滇常年兵

饒邊軍月饒計六百萬兩有奇合無詳請

奏催各省緩舊解新速照部撥之數按月源源濟
滇以維大局等情臣查所陳各節均係實在情
形該司道等綜覈度支籌濟軍需實已不遺餘
力現在邊務正當喫緊饒項竟乏來源商力已
疲久假不歸勢難爲繼若復觀望緘默貽誤匪
輕除函致督臣電商兩廣督臣將撥滇商款就
近徑解大營以救眉急外相應陳懇

天恩敕部行催各省原撥新撥協滇饒項兼程按月

或由號限期漕交庶糧饑無脫節之虞士馬有飽騰之效臣毋任惶悚待

命之至所有關外需餉迫切緣由謹專摺由驛馳

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

礙結會匪捏詞京控摺

奏爲會匪捏詞京控審明擬結恭摺仰祈

聖鑒事竊查鎮雄州孀婦李黃氏遺抱李添沅赴步

軍統領衙門呈控溫鶴軒等抄搶誅殺等情一

案咨解回滇發府取供的名周小四因在湖北

不記縣名地方解役病故換名頂解並非李添

沅正身稟經飭據恩安縣將該匪犯李添沅拏

獲解省並提到被告人證溫鶴軒林鳳鳴鄭效

李洪一併發委審辦去後茲據委員雲南府知

府鄧華熙等審明議擬解由臬司文念祖覆審
召解前來臣毓英督帥在外臣凱嵩親提覆鞫
緣李添沅綽號金不換與夏宗潰周小四均籍
隸鎮雄州李添沅與夏宗潰幼年相識後夏宗
潰遷居省城久無往來李添沅在外遊蕩光緒
七年聽從昭通逆首卯昭詳等入會爲匪謀襲
府城事發漏網其平日結黨擾害惡蹟昭著經
委辦善後道員許繼衡查明稟經飭拏李添沅
以委員訪聞疑係團總溫鶴軒等稟出自知所

犯罪重畏捕遠颺起意京控抵飾先是光緒三年十二月十五日夜李添沅行竊唐洪順家衣物經彝良州同飭差鄭效等協同團首溫鶴軒等查起原贓適其弟幼殤李添沅卽以搶殺等詞私列其父李正暢之名控州查傳並不投審復自行出名以前情由府上控批司委員會審經州委提集人證訊係虛誣稟銷在案李添沅卽就前事鋪張羅織二十餘人自做呈詞赴步軍統領衙門呈控取供解滇中途會遇周小四

約伴同行至湖北不記縣名地方解差在店病
故李添沅乘接解差役未到向周小四捏稱伊
因患病難行願給錢四千文令其頂名替解到
案卽可保釋周小四愚而嗜利當卽允從李添
沅逃回家內吳其母李黃氏赴省候案恃婦搪
延自仍與卯逆餘黨後已拏獲之撒二開在逃
之黃雙籠等四處潛匿並以其母李黃氏無人
照料憶及夏宗潰任省致信懇託內敘有現與
黃雙籠撒二開等會議俟秋收後聚眾起事等

語夏宗潰接信畏累匿未出首時值省城拏獲
另案會匪郭應培等之際並搜獲夏宗潰信件
解案訊供以李添沅未獲擬將夏宗潰監候待
質詳經臣毓英會摺附

奏在案李黃氏旋在保病故驗訊屬實批飭歸案
附報嗣據恩安縣將李添沅緝獲解省並提到
被告溫鶴軒林鳳鳴鄭效李洪質審供悉前情
毫無疑義應卽議結此案李添沅以會匪畏拏
膽敢捏以搶殺重情羅織二十餘人之多京控

抵飾訊明概係虛誣實屬不法自應按例問擬
李添沅合依驀越赴京告重事不實全誣十人
以上者發近邊充軍例擬發近邊充軍業歸會
匪案內先行正法應毋庸議夏宗潰居住省城
已久與該匪並無往來信內亦無相邀入會之
語惟知情不首雖係鄉愚亦應按律問擬夏宗
潰合依謀反知情不首杖一百流三千里律擬
杖一百流三千里解配折責安置周小四中途
受賄頂替雖不知李添沅係屬重犯其所得錢

文贓係在法合依在法贓一兩至五兩杖八十
無祿人減一等律擬杖七十折責發落錢文照
追入官李黃氏在保病故應與訊無凌虐之保
戶人等均毋庸議溫鶴軒等訊明係屬被誣亦
毋庸議無干省釋未到免提失察解犯頂替之
州縣不知地方並免查究除供招咨部外所有
審明擬結緣由謹合詞恭摺具陳伏乞

皇太后

皇上聖鑒敕部議覆施行謹

擬滇奏疏卷二

三

益

齋

奏

懲辦會匪摺片

再會匪李添沅綽號金不換爲前昭通逆首卯
招詳餘黨雄踞一鄉控案如鱗惡跡昭著經清
查善後道員許繼衡查明稟請飭拏該匪畏捕
遠颺赴京捏控希圖抵卸並在途雇人頂替匿
不到案復與匪首黃雙籠等潛藏謀逆僅令其
母投案嗣據昆明縣拏獲夏宗潰搜出該匪寄
信語甚狂悖當將夏宗潰監禁飭拏該匪質訊
經臣毓英附片會

奏在案隨據昭通鎮府將該匪弋獲解省提同人
證質審京控情詞概係虛誣供認結會謀逆各
情不諱由司擬解前來臣凱嵩親審無異查該
匪李添沅卽李金不換以卯逆餘黨捏控潛逃
復謀叛逆實屬兇狡性成罪大惡極值此邊防
多事未便日久稽誅當批飭將該匪先行正法
以遏亂萌夏宗潰訊非會匪僅此接信知情畏
累不首除歸入京控正案另行擬結具
奏並仍飭拏黃雙籠務獲究辦外所有懲辦會匪

緣由謹合詞附片具陳伏乞

聖鑒訓示謹

奏

--	--	--	--	--	--	--	--	--	--	--	--	--	--	--	--	--	--	--	--

謝 賜

御書福字摺

奏爲恭謝

天恩事竊臣齋摺差回敬捧

恩賞

御書福字一方暨奶餅果乾各一匣到臣當卽恭設
香案望

闕叩頭祇領伏念臣忝膺封守疊易年華効涓壤
以無能惕冰淵而滋懼茲屆祥開鳳紀復蒙

寵錫

龍光玉燭均調四海仰

一人之慶

金章特賁百蠻頌萬福之同飮

湛露於醞醑瓊酥味美被

仁風之和煦珍果香濃宜民化洽於

均禔

詔祿

恩隆於

推食嘗先正席榮荷

頌綸臣惟有倍矢靖共益嚴對越懷素餐而勵志率
黔首以臚歡迢遙戴

高厚之施仰承

闔澤黽勉酬

生成之

德永祝

蕃釐所有感幸下忱謹繕摺恭謝

天恩伏乞

撫滇奏疏卷二

三五

益

齋

皇太后

皇上聖鑒謹

奏

爲金幘玉主謀帶隊不諱錄供稟報前來臣以
除惡務盡緬政闇弱宵小生心中外交界之區
豈容姑息養奸致生他變當批飭將該犯郭在
著卽行處斬仍當查緝逸匪以淨根株現在商
賈往來地方一律安靜堪以仰慰

聖懷所有續獲新街餘匪懲辦緣由謹會同雲貴總
督臣岑毓英附片具陳伏乞

聖鑒訓示謹

奏

--	--	--	--	--	--	--	--	--	--

續獲新街餘匪摺片

再緬匪金帽玉前次佔據新街幾開邊覺經騰越鎮廳文武防勦兼籌雇募勇士投入賊中突斬渠魁並殲悍黨全股解散業經臣附片會

奏在案臣以緬患雖平滇防宜固誠恐餘匪竄來邊境萌蘖復生責成地方官認真防緝清查去後嗣據署騰越同知吳晴琦稟稱二月十一日防營都司李祥華接准緬官遞解撫民三十七名據稱緬甸撫民自行安插其籍隸內地者理

合送回等因吳晴琦接名查訊均係保山縣人
當卽派差押解飭取的保歸農惟查內有郭老
十一犯原係積匪在逃與金嶺玉合謀倡亂紳
民皆知該犯狀貌兇悍搜其身有洋槍縱之必
爲後患當與鎮臣張松林密商立縛正法並傳
首緬界以示創懲又訪有著名助惡之郭在蓉
自新街逃出竄伏野人界內以賭誘人希圖勾
結吳晴琦復選帶兵練以查點保甲爲名沿途
偵緝月餘於銅壁關始將該犯擒獲訊據自認

請定米捐章程摺片

再臣等准戶部咨議覆滇省請辦米捐一案令以實米運營倣照海防例銀數核辦按常例請獎並將該處每月實在糧價隨同獎冊咨報等因奉

旨依議欽此當卽行司遵辦去後茲據署藩司史念祖會同善後局司道詳稱查滇省迤南一帶田少山多產米無幾自辦邊防三載沿邊採買罄盡旣妨民食莫贍軍飢近與鮑軍分地購辦食

者愈眾輓輸愈艱春夏雨澤愆期栽插甚晚米價因之日昂查從前採買兵米每石價銀三兩八九錢尙連運腳在內近則臨安米價已至三兩六七錢距營較遠之區價雖稍次而運腳更有過於米價者軍士嗷嗷待哺庚癸頻呼亟應示以畫一章程以速捐收而免觀望此次開辦米捐擬在臨安等處設局由捐生以實米運局由各營自行赴局關支凡捐生運米一石到局自出運腳繩索口袋無論道途遠近概按目下

時價酌中核定准合例銀三兩八錢卽米價再
增若非大相懸殊無庸另議更張擬合出示一
體照收俾資遵守再部議每月實在糧價隨同
獎冊咨部一節辦理實有礙難蓋糧價或有漲
落米數卽有參差各捐生勢必擡價合銀紛紛
計較且一月獎冊米數同一監生而多寡各殊
不惟句稽不易必至捐生疑議觀望不前甚或
員役得以高下其手流弊易滋惟有一律定價
收捐庶幾設法招徠有裨軍食等情詳請具

奏前來臣等往復函商詳加審察該司道等擬辦
各節係爲關顧軍糈參酌定章起見似尙能持
平覈實力杜弊端除咨部查照外謹合詞附片
具陳伏乞

聖鑒訓示謹

奏

撫滇奏疏卷二終

男

季煜
仲斡
景藩
季煌

孫善培校字

撫滇奏疏卷三

覆礦務情形摺

奏爲滇省礦務辦理麓有成效惟商股集無鉅款
銅本挪濟軍需致未能擴充開採情形遵

旨據實覆陳事光緒十一年六月十一日承准軍機
大臣字寄本年五月二十二日奉

上諭雲南礦務曾於上年諭令該督撫廣集商力及
時開採目下軍務已完亟應擴充礦務著岑毓英
張凱嵩督飭所屬實心籌辦並催令在滬委員趕

緊集股赴滇務須事事覈實取信商民以期有裨
時局一面將現辦情形迅速覆奏等因欽此臣跪

誦之餘倍深兢惕竊臣自上年欽奉

諭旨開採五金事關利濟民生杜絕外患豈敢視為

緩圖當卽審察事機訪求利弊以原議滬粵招

商集股海疆有事觀望不前疊經專札專函催

令承辦之員實力勸辦勿得藉延並派員於川

楚地方分股招徠以襄要舉復以鹽法道鍾念

祖諳練精能飭於臣署前設立開採總局凡本

省紳民覓有舊硿新礮皆得赴局面稟移會藩
司立給開山牌票准其試辦民咸稱便而臣夙
夜所顧慮者辦礦之法必須厚集貲本多招健
壯砂丁熟練爐戶一面開採一面前煎煉斯用力
多而成功易成功速而獲利自豐若挾有限之
貲以求速成之效其勢誠難今計招集商本僅
據滬局解到銀三萬兩川局解到銀五萬兩爲
數無多不敷分佈猶幸滬局委員知府全楙績
急公能事力爲其難陸續挪貸支撐試辦蒙自

錫廠運滬銷售藉以款動商情並開辦東川楚
雄祿勸等處銅廠以顧京銅尙爲得手其新獲
牛泥塘一處得礦甚多煎銅不易費用繁重尙
不敢必其有成此商局現辦之情形也本省紳
民報開銅銀等廠四十餘處力薄貲微又縈縈
於得失利害作輟相乘涉其藩籬未卽窺其堂
奧調查局簿獲礦已有十餘處繳銅尙祇數萬
觔其餘有因瘴發水淹停辦者有因銅色不佳
停辦者有因工本不濟停辦者多求借領官本

以資工費柰司庫銅本一項叠因邊饟緊迫協
 饟不敷報部動挪將罄餘數留備繳銅發價已
 難久支實不能兼營並顧此紳民現辦之情形
 也臣維銅本無存亟望商本豐盈庶能擴充調
 辦駐滬道員胡家楨極知顧全礦務大局力果
 心精神商信服現在軍務大定臣已恭錄
 諭旨由驛行催趕緊集股解滇以維時局復催飭川
 省各委員一體遵照實心籌辦並許以集有鉅
 款者即當擇尤

奏予獎敘計能源源匯解不似前此之掣肘爲難
仍屬藩司遇有協饌到時酌提若干歸還銅本
項下俾裕支發而免虛懸總之滇省礦務原可
有爲現查本年二月已將六起頭批京銅五十
萬觔趨運在途擬俟秋閒仍當起解六起二批
藉供鼓鑄惟本難接濟明年能否照解尙難預
計臣仍當督同署藩司史念祖儘力籌畫維持
但使物力充足人工齊集定卽擴充開採以期
日起有功仰副

皇太后

聖主訓勵責成之至意所有滇省現辦礦務情形謹
會同雲貴總督臣岑毓英合詞恭摺覆陳伏乞

皇上聖鑒訓示謹

奏

請催協餉摺片

再雲南本受協省分舊由各省按年協濟銀四十餘萬兩以供兵練糧饗文武廉俸一切雜支是爲協饗自有越南軍務奉蒙

聖恩添撥邊饗以贍關外之軍是爲新協饗各省力有未逮除四川一省外率皆停舊解新而常協旣屬虛懸邊饗仍形缺乏不得已則先後動挪庫存銅本以應急需本年銅本將罄督臣函屬在省司道傳集商號每月向借銀九萬兩湊解

邊饒議訂新饒解至准其扣收至是司庫所入
僅條丁鹽課釐金三項矣臣通盤籌畫既不能
裁邊軍以節饒需卽無由提新饒以還銅本本
既無存銅何從出夫商情之利鈍尙難預期而
官本之盈虛必先熟計今悉移緩就急不及勒
款歸公於辦銅實有窒礙無論非杜漸防微之
道而京銅攸關鼓鑄豈可貽誤要需卷查光緒
三年以後滇省實收銅本銀一百七十餘萬實
起運京銅五百五十萬觔以銅合銀短解尙鉅

現值饒需艱窘臣何敢再請銅本妄瀆

宸聰惟查部撥銅本原係在未解滇省協饒項下酌提撥解直省雖殊其名目滇省則止此來源銅本有贏協饒益絀遇急挪用蓋由於斯擬懇

天恩敕部覈議催令各省關將欠解原撥銅本銀兩照案掃數解滇藉資接續邊陲瘠苦岌岌難支仍冀行催各省將未解上年及本年滇省常年協饒月饒從速指款撥濟俾可分別點綴彌縫以塞眾望並得以撙節款項歸補銅本以次趕

辦京運不致有臨渴掘井之虞臣不勝惶悚待
命之至謹附片馳陳伏祈

聖鑒訓示謹

奏

奏辦昭通匪犯摺片

再滇省自辦邊防主客各軍時有徵調深恐藉名聚眾經臣嚴飭稽查旋據昭通鎮並昭通府縣咨稟近有川省武職陳鎮川稱奉霆軍委派在昭募勇飭人前往偵察見官銜有軍機大臣營務處字樣凡招募以入資之多寡卽派充營官哨長門幾如市察其行跡詭異當卽誘提到案據稱係霆軍舊部隨起獲霆軍委札又關防一二顆一係霆軍總提督關防篆文不全一係統

帶鎮威虎軍行營關防又委充營官空白偽札
並會匪號片多張等情前來臣以案情較重批
飭提省並一面咨准提臣鮑超查覆本營並無
其人必係匪徒假冒等因行司一併核審去後
茲據雲南府等審明該犯陳鎮川又名陳玉春
四川大足縣人向係當勇上年冬月聞霆軍來
滇起意冒充營務處曾任宜昌鎮奉委招勇騙
錢使朋央得不知名字之周姓雕就關防繕造
委札各件謊騙已獲之譚茂觀等三人未獲之

陳金勝等五人來至昭通曾有陳興發等三人
投營議定各出銀伍十兩尙未過付就被訪聞
拏獲詰以號片稱係他人寄存之物堅不承認
等情由署臬司熊昭鏡審解前來臣親提研審
無異查該匪陳鎮川卽陳玉春以游勇詐爲假
官僞造關防委札招募勇丁實屬胆大妄爲罔
知法紀雖訊爲斂錢起見按其造札詐官罪已
至斬時當多事游勇往來若織一經勾結易滋
變端幸號片尙未散出供雖狡展罪已無可再

加臣未敢稍事拘泥當於審明後卽照懲辦土
匪章程批飭先行正法律昭炯戒而靖人心譚
茂觀等訊不知情酌照不應重律折責遞籍管
束投効之陳興發等前據昭通府縣訊係誤被
誑騙銀未過付應免置議繕札之周姓並無名
字並免查究僞造關防等件案結銷燬除供招
咨部外所有懲辦匪犯緣由謹附片具陳伏乞

聖鑒訓示謹

奏

請 旌獎孝子摺片

再據署思茅同知吳光漢詳稱查得廳屬已故孝子邢敬修係民人邢自寬之子賦性純孝其父早故母汪氏家道赤貧邢敬修習鍼工以餬口養母每日汪氏饗飧必自工所按時趕回親視而後進卽溺器褻衣皆親自洗滌終身如一日其母病篤湯藥先嘗不離左右歿後哀痛絕粒殮葬如禮廬墓三年晨昏奉膳如生時經前任同知給額旌門邢敬修旋於咸豐十年六月

病故迄今二十餘年廳屬老幼無論知與弗知咸稱爲邢孝子洵屬孝行可嘉久而益著據廳屬貢生張瓊英等呈經儒學劉子莊查明取結造冊由廳具詳前來臣覆查無異相應仰懇

天恩俯准

敕部旌表以彰孝行而維風化謹會同雲貴督臣岑毓英雲南學政臣丁立幹附片具陳伏乞

聖鑒謹

奏

奏逸匪煽聚窺伺大理情形摺

爲外來逸匪潛謀聚眾圖攻大理府城當經捕獲
黨與慎固城防現派兵練四路兜剿務將首夥
悉數殲擒恭摺馳陳

聖鑒事竊照滇省迭經兵燹近始麤安自督臣出辦
邊防臣深慮內患偶萌必致牽動兵力節經責
成各屬實行保甲防範稽查不得稍涉大意春
閒准署貴州撫臣咨黔省拏獲僧人性天一案
據供首逆朱大明聞逃往川滇一帶藏匿咨會

查拏復經臣密飭大理等府實力躡緝無論深山窮谷逐細梭尋去後茲接提臣飛咨八月二十日風聞蒙化鄧川賓川等廳州傳言有外來奸匪稱謂悖逆煽惑鄉愚樹旗起事等情立即派兵四出偵探一面會督道府佈置城防二十四夜據守備李桂芳回稟探得蒙化屬之金牛屯太平寺紮有匪徒數百人正派兵馳往圍捕二十五日據探兵於中途盤獲匪目黨帽與陳大辮子二名由迪西道督同府縣審訊據供首

逆姓朱自稱明後僞大元帥姓董似四川口音
潛來漾鼻地方神道設教信從者多約有三四
千之眾因訪拏緊嚴倉卒起事約定走點蒼山
私路撲攻大理府城八月二十四夜前隊走至
山頂遙望城頭火光知有準備各路夥黨又未
來齊不敢前進叫我等前來打探當搜出黃旗
諭帖傳單等件旋又拏獲賊黨卞長幅等五名
當將先獲二犯正法以靖民心現在防剿兼籌
並分咨鶴麗騰越兩鎮一體堵拏等因並據署

迤西道翁壽夔大理府知府桂霖飛稟前來臣
查首逆朱姓難保非卽逸匪朱大明膽敢誘惑
多人希圖起事幸提臣坐鎮大理道府亦素得
民心早已慎固城防案經破獲初起烏合之眾
撲滅不難惟迤西山徑險僻漢夷錯處民教雜
居誠恐勾結蔓延爲患非淺現經通檄附近文
武紳團厚集兵練投以機宜四路兜捕復懸立
重賞如該匪望風竄匿務當搗穴追奔將首夥
悉數擒獲並嚴飭永北廳營扼要設防斷其竄

川之路所有逸匪潛謀煽聚窺伺大理情形謹
會同雲貴總督臣岑毓英雲南提督臣黃武賢
由驛馳

奏伏乞

皇太后

皇上聖鑒訓示謹

奏

--	--	--	--	--	--	--	--	--	--

奏獲逸匪摺片

再迤西地方匪徒煽聚謀攻大理府城先期破
獲調派兵練並飛飭各屬會合搜捕情形當經
奏報在案隨准提臣黃武賢咨會派將督帶兵練
前往八月二十七日至雞茨坪遇賊數百人我
軍直前迎剿鏖戰數時匪勢紛紛敗退兵練追
至太平寺地方殺賊一百餘名陣擒匪目張玉
成等六名耳級六十餘付奪獲器械旗幟多件
餘眾潰散我軍受傷十餘人並據迤西道大理

府稟報跟蹤拏獲僞大元帥黃潰芳訊係首惡
立行正法連日所獲匪犯現在確訊稟辦又據
賓川州稟報該州聞信後卽會營調團防捕當
擒獲夥犯曾添受等二名供認分路糾匪不諱
又永平縣稟報該縣團紳於八月二十七日集
團圍攻陣擒匪目七名殺斃四名割獲耳級多
件又鄧川州稟報拏獲雷音西來等寺會首向
明里蘇得寬等五犯解府審訊各等情據此臣
查此起匪徒實係外來僧道散居寺觀神道設

教煽惑鄉愚附和則若蠶屯聞拏則皆鼠竄現
經各屬堵捕迭有斬擒大致已經解散督臣昨
復派副將李福興等各招民勇由提臣督同梭
勦自不難一律殲除惟首逆在逃現准提臣函
咨訊據張玉成供首犯名朱潮品現在貴州香
爐山及威甯一帶往來實未來滇次爲童二將
又名童沆復提續獲各犯隔別推求詰以首匪
年貌亦均未見有朱潮品其人係童逆託名惑
眾等因查該朱潮品是否與童逆分路勾結抑

竟係童逆託名虛實亟須根究以免漏網當飭
該府縣確審俟訊明各供稟到另行

奏報臣仍一面咨會署貴州撫臣飭屬查拏總期

首要悉數擒獲淨絕根株毋任延蔓所有勦捕
獲勝及解散大概情形臣謹會同雲貴總督臣

岑毓英雲南提督臣黃武賢附片具陳伏乞

聖鑒訓示謹

奏

覆查明緬甸邊防道路摺

奏爲緬甸邊防道路就省中所查大略先行遵旨覆陳一面豫籌布置委員查探情形恭摺仰祈

聖鑒事竊臣承准軍機大臣字寄光緒十一年九月十八日奉

上諭昨據曾紀澤電稱英久佔南緬今圖其北著岑毓英張凱嵩派委妥員不動聲色密探英緬近日詳細情形趕緊馳奏一面相機籌措固我邊鄙毋得稍涉張皇至滇省與緬甸交界各要隘係何地

名里數若干暨入募究竟坐落何處是否卽係新街並著先行確查奏聞隨卽詳晰繪圖貼說呈覽等因欽此遵查緬甸近年政令不修勢成孱弱沿海繁盛之區被英夷蠶食殆盡蓄志密謀匪伊朝夕臣忝任邊圻時深隱慮茲英夷旣銳圖緬北誠如

聖訓不獨屬國受患尤慮逼近吾圉亟宜爲未雨綢繆之計臣於祇奉後謹卽欽遵委員並密咨騰越鎮暨行沿邊各屬一體豫籌布置並確查與

地情形至日再行詳晰繪圖貼說恭呈

御覽查緬防始於騰越歷龍陵保山順甯雲州緬甯
威遠至普洱之九龍江止由西而南迤邐二千
餘里騰越中隔野人山三站龍陵以下則環拱
皆屬土司邊民互市處處可通惟新街各國通
商馬頭獨大距騰越龍陵爲最近由騰越至蠻
允四站計程三百五里此爲中緬交界處再分
三路至蠻暮上中兩路久經梗阻現惟下路經
彭洗野寨計程一百六十五里爲商販大道再

由蠻暮水路二百餘里一日可至新街此商行
一路也又由騰越一百七十五里至于崖出銅
壁關至新街又由隴川出鐵壁關由野山三日
抵新街之背計程均三百七八十里又由盞達
土司出巨石關抵緬地打鑼江程亦三百餘里
又由盞出萬仞關由盞達西汛出神護關均抵
緬地猛拱程約千里此又騰越出關各路也由
龍陵經芒市遮放兩土司至戛中卡二百八十
里交緬界四十里至宛頂出新街大道又由芒

市分小路至弄球卡交緬界出猛己程亦相等
此龍陵至緬之路也由永昌出蒲縹姚關歷鎮
康孟定兩土司至緬甸木邦之麻栗坳約五六
百里由順甯雲州緬甯至耿馬抵麻栗坳亦六
七百里此永昌順甯至緬之路也臣前因金國
玉一案督屬講求邊防道里互相考證大略如
是惟八募地方上年奉

旨卽曾再三飭查邊外實無其名或卽係新街英人
改名抑或蠻暮音由譯轉均未可知現復行查

務期得實至目前籌防議者皆謂不外添設重
兵增修關卡二事添兵之說既無此饒事亦張
皇至騰越之八關九隘如天馬漢龍兩關久淪
夷地餘概傾頽且側出旁通無險可守前人已
有議之者今爲邊計似惟有遴選廉明誠信熟
習邊情之文武大員假以事權或委以地方之
任撥給兵練令其扼駐操防整頓鄉團輪流偵
探以備緩急其尤要者英夷所畏惟野人亟當
羈縻招撫待之以恩噉之以利使爲我用各屬

土司酌給資糧器械令其自守藩籬一面借助
 緬人以夷制夷則覺不我開而邊防自固惟是
 動須經費事鮮成規且邊地乏材求能應變而
 識大體者一時實難其選督臣在滇多年周知
 灼見臣已咨會函商昨由督臣先委副將袁善
 李文秀馳赴新街確探情形再行相機妥辦所
 有查明緬甸道路大略先行覆陳並豫籌布置
 緣由謹會同雲貴總督臣岑毓英恭摺由驛馳
 奏伏乞

皇太后

皇上聖鑒訓示謹

奏

報英緬情形摺

奏爲接據邊報探明英緬近日情形恭摺馳陳

聖鑒事竊

臣

昨將籌議緬防及沿邊道路大略覆

奏在案頃接騰越同知陳宗海稟據阿瓦坐探報

稱九月十八日到英輪一隻日則傍岸夜泊江

心火光澈夜或言英人曾向緬國買木未交來

索定銀二十二日駛回漾貢駐瓦洋商多附船

轉貢者二十三、四等日又到輪船二隻言前日

輪船乃英國大臣赴緬會議欲於瓦城設官會

辦緬事和戰卜於從違言索銀乃託詞也聞緬國君臣會議僅鄧打們几一人主戰與緬王意同餘則皆以戰則必危聯名具奏尙無定見現瓦城洋商收帳甚急華商則多將貨移回新街並據新街探報無異等情前來臣維英緬之事雖兵戎未動而衅已啟端縱卽能和亦不過暫紓眉急內地邊境亟當力圖防維除仍飭該廳再行確探及通行沿邊各屬一體籌防並飭催前派委員速將地圖繪呈核辦外所有接據騰

越探報情形謹會同雲貴督臣岑毓英恭摺由
驛馳陳伏乞

皇太后

皇上聖鑒訓示謹

奏

報英緬決戰摺

奏爲續據邊報探明英緬現已決戰及繪進騰越地圖恭摺仰祈

聖鑒事竊臣前將籌議緬防及委員赴邊查勘繪圖並英輪至緬和戰未決情形兩次馳

奏在案茲據騰越同知陳宗海稟據阿瓦城坐探報稱緬王因羣臣主和之議過於畏懦已定決戰親身出征隨令列省躉溫爲帥揆溫副之統兵二萬守們蜡復以繆洗躉溫等領兵分駐洞

烏洞蘆以鄧打們已等隨征洋兵已於九月二十三四等日出印度抵漾貢雇定火輪五艘候用洋輪有赴新街者二十九日皆於半途折回緬王先擇於十月初八初十等日起程忽於初七日連夜水陸並進分馳赴防十三日有洋船一艘由新街回貢行至摸打被緬王繫其掌船四人解赴瓦城並飭人逼收印度商人孟孟拖家所存槍礮現傳聞緬兵在青捧外接仗小勝等情並據將沿邊地圖稟呈前來其委員及此

外各屬輿圖尙未繪到茲先將騰越地圖照繪
並詳細貼說恭呈

御覽俟委員等繪到如有異同再行另繪恭

進伏查此次緬事由於英人有意尋衅前得探報
已料其必至於戰然未嘗求自強於平時忽欲
僥倖於一舉恐將不支惟是內地籌防情形既
緊自不能不藉資兵力而沿邊遼闊應防之處
甚多兵饟皆覺難敷臣前疏已籌及之且張皇
稍甚既啟英夷之忌尤易滋緬國之疑查目前

兵事尙在阿瓦漾貢之交距新街千有餘里不致遽及內地臣前已咨行騰越鎮廳及沿邊各屬妥速籌防暗用野人撫綏土屬整頓民團用固吾圉頃據稟報騰越已挑獲壯丁一千五百名講求操演分布關隘如情形緊急擬再移會提督由大理就近前往另商督臣遴派知兵大員馳赴會辦再以重兵繼之似亦足保無虞臣已將以上各情函達督臣商定另行會奏至緬中電信現已斷絕洋船亦不上駛文報僅

至各界而止偵探頗難得實臣聞有騰越舉人
張成濂其家現設號於瓦城並已函商督臣派
令前往較之官弁人情既熟亦更機密再八募
地方現據騰越同知稟覆卽屬新街土名新街
在緬爲八募城自屬確實除仍飭該廳委等確
探並督飭沿邊各屬慎密籌防勿稍疏懈外所
有據報探明英緬戰事情形及繪進地圖緣由
謹會同雲貴總督臣岑毓英恭摺馳陳伏乞

皇太后

皇上聖鑒訓示謹

奏

報英緬議和摺片

再正繕摺間接據騰越廳十一月初八日稟據緬都坐探報稱十月初間有商輪三艘內匿英國兵丁軍火欲襲們蜡經緬官轟沈一隻斃英兵數百名緬兵傷亡亦多緬王於初七日得報是以息遽赴防十一日先後駛上英輪八艘緬將先鋒捧溫連日與戰失利退回們蜡該處地勢險要兵將亦多無如孱弱未經戰陣英人連攻數日緬將不支十三日棄們蜡而走英人乘

勢於沿江兩面用礮轟擊緬兵退走英輪上駛
跟追直至緬降地方幸各省躉溫兵到擊破英
輪一隻始得堵住而緬降下至們蜡一帶要口
均爲英人佔據現英將函致各省躉溫云渠等
此來欲與緬王議事限三日回覆聞緬王於十
九日已派絞苗躉溫同法國駐緬之員前往面
會似有議和之局等情前來臣查緬降地方距
緬都僅二百九十里以下要口英均佔去是失
地又千有餘里勢甚窮感議和事在意中惟緬

既不支內地之隱憂益爲深切除一切防維事
宜容與督臣妥商籌辦並飭再行確探馳報外
所有緬國兵敗現在議和情形謹會同雲貴督
臣岑毓英附片馳陳伏乞

聖鑒謹

奏

--	--	--	--	--	--	--	--	--	--	--

奏獲黑蠻賊渠摺

奏爲川境黑蠻積年焚掠爲滇巨患遵

旨督飭密拏首要現經兵練殲除恭摺仰祈

聖鑒事竊查四川西昌縣屬黑蠻簸箕力甫自光緒

六七年以來迭次擁眾渡江肆擾巧家廳屬搶

擄燒殺爲害慘烈前督撫臣業將防剿情形奏

報上年派練攻克梗簸救出被擄男婦四百餘

名而該首匪仍尙在逃復經督臣附片會

奏光緒十年十二月十三日奉

旨知道了仍著督飭在事員弁密拏簸箕力甫務獲

懲辦以靖邊陲欽此督臣恭錄咨會到臣並嚴飭

專辦江防遊擊顏雲芳設法密拏臣以大軍正

顧越南邊防該蠻虎視滇北地方不惟荼毒民

生實慮牽制兵力節經責成巧家同知朱坦能

懸賞購線與江防營員不動聲色窺便掩擊務

獲元凶並查出該廳民蔣仕選有句結黑蠻暗

助軍火情事密飭該廳營拏獲懲辦先除內奸

夏間朱坦能派令土目錄興朝渡河掩捕人少

未能得手茲據幫帶練軍參將顏桂芳稟報冬
令水涸正蠻匪出巢之時探得簸箕力甫近復
糾黑蠻數百人於江北紮立營寨勢將大舉入
滇當會商朱坦能乘其部署未定於十月二十
一夜派儘先把總姜佐旺武生顏春芳挑帶奮
勇兵練一百五十名由間道抄逼賊寨派遊擊
莊正修都司周厚興督隊繼進約會合圍另派
千總王天才雷祥光帶領練軍鄉勇渡河埋伏
防堵要隘四更時分姜佐旺一軍先至直擣賊

營該匪等始行驚覺猝不及防未識我軍多寡突圍亂竄我軍槍礮交施殪匪甚衆該匪首抵敵不住率其悍黨且戰且逃姜佐旺力督奮勇兵練追上將該匪首殲斃陣前梟其首級並斃其黨數十人餘衆潰散我軍亦陣亡六名受傷十九名該廳營傳集難民認明確係簸箕力甫首級專弁解省呈驗前來委員覆驗屬實臣查該匪簸箕力甫著名兇悍臣在四川任內卽知其爲黑蠻渠魁滇北僅隔一江屢遭焚擄防無

已時數歲以來民不安枕茲幸該文武等協力和衷出奇制勝乘其未動而擊之積年巨寇一旦伏誅邊境居民歡聲雷動此皆

天威遠播得以安靖邊陲所有在事員弁不無微勞

可否由臣等擇尤保獎以示激勸出自

聖主鴻慈除飭將該匪首級仍發江邊示衆並將江防照常整頓毋許稍涉疏懈外所有遵

旨密拏黑蠻賊渠緣由謹會同雲貴總督臣岑毓英

恭摺馳陳伏乞

皇太后

皇上聖鑒訓示謹

奏

報英人詐取緬地摺

奏爲邊報英人詐取緬地詳細情形恭摺仰祈

聖鑒事竊英緬爭戰前迭據探報先後由驛馳

奏並聲明緬中電信斷絕偵探頗難得實各在案

嗣據新街探報十一月二十一日有難民至彼

謂緬王已逃至錫蜡土司地面英踞緬都而詳

細情形仍多互異次日晚英輪五艘至距新街

四十里之咱布底函召駐街緬官會議等情是

洋船業經上駛緬都自己失守究無日月可據

當經飛飭續探去後茲於十二月十三日據騰越同知陳宗海飛稟十一月二十八日據瓦城坐探報稱英之入緬也係佯稱送昔年出亡王子孃偶前來復國緬官誤信是以旬餘卽抵緬降後見緬人與戰復誘言和迨緬王派人會議仍執復國之言約定十月二十二日到城面定是日英師大隊擁入都城緬官問以王子何在彼云我卽王子都人始悟其詐英卽將緬王及宮眷用輪送去漾貢從官僅四人餘悉生降惟

各土司招降未至民人不服多在都城附近羣聚搶掠英人不能安撫法國駐緬之官斥爲盜賊行徑尙有爭論緬王亦豫將王子二人交孃蕊坐把帶同出亡欲圖後舉現有洋輪五艘上抵新街安撫商民照常生理等情前來臣維英人雖已襲踞緬都而民人土職皆未服從且法人情形亦有爭論當茲大亂之餘更難保沿邊匪徒不乘機滋事內地防堵喫緊前已由督臣調派貴州古州鎮總兵丁槐帶練二千馳往現

尙未一律到騰臣現已函商督臣妥爲籌酌並
催令丁鎮趕緊赴防相機先爲布置一面移行
該鎮廳先派標兵及各隘卡丁練分紮銅壁等
關並調土兵駐紮蠻允不動聲色嚴密防範除
將邊報二件抄送軍機處及總理衙門查核外
謹會同雲貴總督臣岑毓英恭摺馳陳伏乞

皇太后

皇上聖鑒訓示謹

奏

覆緬甸邊防並礦務情形摺

奏爲緬甸邊防喫重謹將布置防範並亟籌礦務
以杜覬覦情形恭摺由驛覆陳仰祈

聖鑒事竊臣光緒十一年十二月十七日承准軍機
大臣字寄光緒十一年十一月二十九日奉

上諭據總理事務衙門呈遞李鴻章信函並鈔錄法
人嘉爾蕪來信其於英人有事緬甸言之甚詳等
因欽此臣維英之併緬志在通滇與法之據越南
同一用意滇省西南兩面強敵憑陵誠寢不安

枕之秋也近日騰越探報絡繹而來一云英踞
阿瓦後分兵千餘至新街緬官悉降議以六百
人駐新街以四百人紮緬界之蠻暮並招致附
近野人前往商議秘不得聞一云緬王子二人
出亡現在瑞波老城緬臣同心保護共圖恢復
號召四方緬都及新街降官亦復密商內應稔
祚土司誘殺英兵數十人一云緬都有警英兵
僅留五百人駐紮新街其餘兵丁船隻概行撤
回阿瓦防守昨領事官阿大雜遣派緬人齎遞

字帖來騰大意約與我各守疆界照舊通商倍
加和好等語據此情形緬旣叛英立足未定當
無得隴望蜀之思而騰越實與毗連督臣已派
古州鎮丁槐帶兵二千會該鎮朱洪章集兵守
隘臣復飭令該廳陳宗海調集卡練鄉團弩手
確偵嚴防並派武職李生道杜秉陽等徧歷野
寨撫慰野貫給賞羈縻咸歡呼願爲我用暫時
似尙無虞據法人來信英人志在大理勸調黑
旗招集東京散勇駐屯永昌等府誠如

聖諭顯係進退失據藉我紆難實已燭破其奸夫英
法之迹雖分其心則合彼蚤駟相依多方以愚
我大言以恐我惟當持以鎮靜隨時審酌機宜
大理地在腹心距騰越約七百里向有法人教
堂查無英人設立回回教堂之事我軍現紮騰
越實在永昌大理之前可爲屏蔽願臣所籌慮
者不止騰越一路也如順甯府屬通緬木邦中
間雖隔土司殊不足恃若由緬之孟艮直趨九
龍江至普洱之思茅廳路祇七站至府城二站

尤爲便捷冬初有英領事班德瑞者持照來滇
聲稱前往思茅察看洱茶生理阻之不得情涉
可疑又臣曾接李鴻章函謂英人有從西藏造
火車路以達金齒關之說金齒關在麗江府境
凡此數路皆與大理相通滇以患貧患寡之區
西南袤延數千里若處處設防無此兵力實亦
無此饟需且入冬以來協饟無一至者督臣聞
沿邊團練尙稱勇悍該民人事關切己意能奮
力捍衛鄉閭現在詳立規條嚴行誥誡分屬委

員會同地方官整頓鼓舞儻值緊急層層設伏
擊之勿使闖入一步惟卷查光緒二年煙臺和
約有准英人在大理府通商一條彼如擁眾至
境執通商之說而來拒之慮啓弊端納之恐多
叵測究應如何辦理之處相應請

旨遵行再雲南礦利彼族久已垂涎現在東川楚雄
麗江永北均有銅廠而蒙自錫廠馳名最遠距
邊最近此外礦苗所在多有調辦乏資前撫臣
倡議招商迄無成效臣亟思各省關欠解銅本

二十餘萬如數補解亦可有爲懸盼至今均未
咨覆實無以供擴充之用而杜窺伺之萌臣蒿
目之餘不敢徒託空言稍有隱飾所有籌辦緬
甸邊防並規理礦務各情形謹會同雲貴總督
臣岑毓英遵

旨由驛覆陳伏乞

皇太后

皇上聖鑒訓示謹

奏

撫滇奏疏卷三終

男季煜
仲所孫善培校字
景藩
季煌

撫滇奏疏卷四

條陳籌邊四策摺

條陳附

奏爲籌維時勢未雨綢繆謹抒一得之愚條陳四
事恭繕密摺仰祈

聖鑒採擇施行事

臣

聞事豫則立必當履安而思危

患伏無形所貴持盈而保泰我

朝統壹區宇萬國歸懷

文德

武功炳耀千古先年如準夷回部大小金川負固稱

撫滇奏疏卷四

益

齋

兵次第殲滅泊乎金田會匪擾亂十餘年蔓延
十餘省亦復禽獮草薶悉數誅夷內憂旣平外
患迭起近年日本吞併琉球窺伺高麗法人佔
據越南英人襲奪緬甸彼固畏我詰問而佯與
敦好詭詞以保護爲名迹彼所爲愈出愈奇漸
偏漸近其志何嘗須臾忘中國哉以彼持照游
歷到處私繪輿圖覘地勢也傳教設堂以利句
誘鄉愚結漢奸也今復攻取屬國扼要屯兵意
在翦伐枝葉徐圖動搖根本也夫來以漸者其

謀必深發之遲者其禍尤烈當此之際若復遷就衷衷不卽早爲之備任彼巧言以給我合謀以圖我多方以誤我臣恐敵情叵測時事日非也中外言者思患豫防汲汲爲自強之計購買洋槍講求機器置辦鐵艦冀與爭勝臣固心知其然而竊有疑焉夫凡事取法乎人必不能遽得其妙我軍心膽不壯技藝未精雖利器亦不能善事且彼以其舊製者售人而留新式以自用聞滇軍所持洋槍力只能及數百步敵人所

用者輒及二三里之遙此可概見而彼又昂其價值承辦者復浮冒開銷運費尤鉅竭中國之貲財以從事於採辦製造一旦有事募軍之貲轉形匱乏則所謂自強者適自取弱耳未可恃爲萬全之策也臣年衰智淺未有遠謀顧念時勢艱難正

皇太后

皇上宵旰勤勞勵精圖治之時臣四任封圻受

恩深重敢不殫心籌畫勉行一得之愚竊維自強之

方大要在修明武備而理財用人固結民心實
爲當務之急允宜相輔而行爰是不揣庸愚條
陳四事繕具清單以備

採擇施行伏乞

皇太后

皇上聖鑒訓示臣無任惶悚屏營之至謹

奏

--	--	--	--	--	--	--	--	--	--

謹將籌維時勢未雨綢繆條陳四事恭呈

御覽

計開

一節浮費以儲要需也自越南用兵數年糜帑甚鉅府庫空虛不得已乃借商項洋債此挖肉補瘡耳士民家負累過深認息綦重必致生計益艱爲債家所挾制窘迫能勿戒乎臣意財無自生要在節用今腹地無事省分防勇當酌撤冗員當酌裁一切例支之款當酌緩卽現在辦

防之區亦宜裁併精壯嚴覈虛糧以節糜費合直省計之每歲當可省銀數百萬

朝廷復敦崇節儉爲天下先凡不急之工可省之費無益之需諸從擷節而又追有著之款嚴虧欠之條海防捐輸展限辦理庶幾儲積漸豐財用日足緩急有資矣

一選邊材以資鎮守也沿邊重鎮寄託匪輕今之膺專閫者未必皆膽智超羣也在統屬者破除情面權衡功過爲地擇人湘淮諸軍立功將

佐漸次凋零聞尙有未經出仕者應請飭原統大臣舉其廉明樸勇素所深知者薦列於

朝任之要地俾其訓練操防當可得力如缺少人多似可發交邊省督撫察其才力試以事功儲爲他日提鎮之用大抵裁勇百名之費可養得力將佐五六員千軍之力一將之謀不其要與一固結民心而泯參差也官民一體用克衆志成城互相保衛而攜貳導之有漸禍變伏於無形莫甚於民人從教一事彼族蓄謀旣久操術

尤工佯以勸善爲名誘民從教計狡而毒彼直
欲人其人而潛移默奪之耳蓋民一入教不歸
保甲不服官長恃教堂爲護符良民嫉之而莫
可如何有若舟中敵國十數年後教民日多不
堪設想臣意已從教者固礙難挽回未入教者
當密爲鈐制譬如家有數子其劣者被人招誘
游蕩忘親則必嚴束其餘勿爲漸染擬請

密諭直省督撫揆度事機各出所見設法化導防閑
俾民心固結共識尊親亦亡羊補牢之一法也

一訪求奇才以備任使也洋人火器之精勢難與之角勝然主客之形既異眾寡之勢亦殊彼以水師遠涉重洋人情不諳立足不穩容有能以拙勝巧以謀絀力以靜制動者山陬海澨懷材抱異之流往往恥於自薦未嘗求之不可謂下無其人也擬請

敕下直省督撫留心物色實力揆求並選派精細之員徧歷所屬採訪勿取虛聲務裨實用苟得其人量材計能奏請

甄錄委用籌備邊防

國家德澤涵濡率土同仇人心思奮安見芻蕘無
可採之論草茅無可用之才乎

奏英緬相持摺

奏爲英緬仍在相持邊防孔要聞英有潞江東地
咸歸中國之議語涉朦混恭摺由驛馳陳仰祈
聖鑒事竊臣光緒十二年正月二十六日承准軍機
大臣字寄光緒十二年正月初六日奉

上諭據曾紀澤電信近商緬事頗順英擇緬教王候
中朝俞允並照前進獻潞江東地咸歸中國均將
定議是英於中華並無衅端惟前議尙在未定滇
省邊防不容稍涉懈弛等因欽此臣查騰越一路

業經丁槐帶兵到防騰越鎮廳亦厚集兵練嚴
加守禦普洱順甯兩路現經號召鄉團立法訓
練捍固鄉閭並委員馳往會督辦理在案迭據
探報英緬仍舊相持各路豎柵固守並不時出
山驚擾英兵支撐防禦不克進攻近日有瑞波
緬官詐投英人約發兵數千由織梗前往緬兵
埋伏半途出其不意傷斃英兵一千餘人英又
募閩粵人數百以英兵三十餘人率之往探稔
祚路徑被戍卒截殺多人遁回復被沿途盜殺

逃至麻洞僅贖四人英近派其酋長由印度來

阿瓦緬人稱之爲布印幹察看叛服情形不知

作何舉動新街尙有英兵數百屯紮昨復分往

猛拱等語以臣揣計緬人心不服英勢須另立

緬王庶可相安英議有擇緬教王管教不管政

之說無非意在蔓延誘惑姑予緬以虛名而坐

收其實利耳至其所議潞江東地咸歸中國一

語實堪駭異夫以潞江東地歸我則潞江以西

其將屬英乎臣詳考輿圖博稽衆論潞江係內

地在永昌府西南一百二十里渡江西至騰越
廳城計一百七十里由騰越至滇界之蠻允計
三百里又渡江西南至龍陵廳二百里由龍陵
至交界之孟定土司二百餘里八關九隘皆環
列潞江外西南一帶彼議潞江以東歸我竟視
潞江以西數百里悉爲緬地語殊朦澀曾紀澤
身在外洋殆未及諳悉形勢稽考疆索據英
人所議以陳達耳若如其議則我顯被侵欺險
隘全失騰越龍陵兩廳及所轄十土司勢將淪

於外域迨後與之更議必至膠轄實屬關繫匪輕相應先事

奏陳請

旨敕下曾紀澤及時與之剖辯杜其欺罔之謀庶免

藉爲口實再臣招撫野人之議疊據派往紳弁

稟復其毗近緬界如罵灘等寨野夷已與英通

其接連滇界諸野寨逐經宣諭給賞各皆願助

官軍出力合併陳明事關大局臣謹會同雲貴

總督臣岑毓英由驛五百里馳陳伏乞

皇太后

皇上聖鑒訓示謹

奏

覆查大理設立回回教堂摺片

再臣前奉

諭旨飭查英人在大理設立回回教堂與緬甸印度回黨聯爲一氣等因欽此當卽欽遵覆

奏並一面密飭確查去後茲據大理府知府桂霖稟稱該府城內英人向只設有耶穌教堂係該國人施題鳳孫道忠主教上年十二月內復有美國人喜嘉來彼現三人居住並無回回朝拜教酋之事此外亦別無所謂回回學堂者並據

府屬各州縣先後稟覆均稱查屬子虛惟浪穹縣屬之沙鳳村向有法人教堂近日規模愈闊司鐸范若望常往來於永平及蒙化廳屬之漾濞各處從教之民頗眾客籍居多土著僅止數戶隨時查照條約出示戒諭現尙相安亦無英人教堂各等情前來臣查英人曾於騰越各野寨設有學堂數處從教皆係野人距大理尙遠內地回民亦未前往朝拜該嘉爾蕪函稱或卽指此而故爲張大其詞以圖聳聽惟大理城內

既有教堂難保不暗相勾誘稽查亟應加嚴除再飭各地方官妥爲防範外所有查明大理僅府城設有英教堂並無回回學堂緣由謹會同雲貴督臣岑毓英附片具陳伏乞

聖鑒謹

奏

--	--	--	--	--	--	--	--	--	--

奏英據緬地摺片

再英據緬地人心未服偵探情形經臣先後

奏報在案嗣迭據邊報英人因命增王子仍駐紮
澤督兵往攻互有傷亡緬人擒獲英官茲列墊
之弟並將官二員英人遣使議贖緬令將前被
擒之員互換未允並復添兵往攻稔祚仍前堅
守惟猛拱地方因緬官先赴稔祚被英襲取現
調集野貫議開寶石綠玉樹木各廠悉歸公司
運辦餘貨方准商運復有輪船一艘載兵百餘

駛抵新街逐日修路將抵蠻暮各處盜賊猖狂
如故英大臣比臘抵緬察看無術維持仍旋漾
貢行時責讓茲列墊未能平服緬地虛糜經費
回時再請加兵辦理等語臣維英人於緬備極
經營人心仍難安靖惟猛拱爲殷富之區外與
印度相連內與神護巨石各關緊接迭經臣咨
行騰越鎮廳會商丁槐擇要妥爲防範據丁槐
來函已馳赴沿邊查勘道路並安撫土職夷人
皆以大軍臨邊均願隨同報効卽平昔梗化之

猛卯土職亦樂供驅策現派兵分駐蠻允杉木隴兩處丁槐親駐千崖於虎踞山築營建礮四路策應辦理亦尙妥協除仍飭親赴神護關一帶查勘防守務期有備無患外所有近據探報情形謹會同雲貴督臣岑毓英附片馳陳伏乞

聖鑒謹

奏

請旌獎孝婦摺

奏爲割股療親孝行可嘉籲懇

旌表以維風化恭摺仰祈

聖鑒事竊據署布政使史念祖詳准迤南道陳廷珍

咨據元江直隸州知州曹廷銓轉據儒學學正

陳克儉申據紳士張保岐等公呈查有州屬已

故孝婦李張氏係歲貢生張青錢之室女生於

道光二年適同籍職銜李暢和時年十七姑陳

氏垂老多病素患吼咳氏奉甘旨侍湯藥曲盡

其道鄉里多之咸豐二年九月姑疾大劇醫藥
皆窮氏焚香跽禱潛割股肉和藥以進痼疾立
瘳四年十月姑以壽終氏哀毀瘠立喪葬如禮
咸豐五年三月氏因痛姑過甚旋亦病故時年
三十四歲計事姑閱十七年洵屬孝行可嘉由
州查取冊結申由司道詳請會

奏前來

臣

查定例割股或致傷生不准

旌表如有請交部議者其入祠建坊之處請

旨遵行等語近年以來具

奏成案均蒙

恩旨准旌茲該已故孝婦李張氏淑貞其性誠篤其
心但祈姑病之瘳遑顧婦身之痛精誠感格卒
能立起沈疴孝行昭彰洵屬可風流俗雖徑直
似嫌愚孝而閨闈宜諒初心合無籲懇

天恩俯准

旌表以維風化除將冊結分送部科外謹會同雲貴

總督臣岑毓英雲南學政臣戴鴻慈恭摺具陳

伏乞

聖

太后

皇上聖鑒訓示謹

奏

奏緬敗英人摺

奏爲近據邊報英人迭敗於緬近移攻捧干一帶
及籌防布置情形恭摺馳陳仰祈

聖鑒事竊英緬彼此相持內地邊防業已扼要布置
先後會

奏在案續據騰越龍陵兩廳轉據坐探舉人張成
濂報稱緬之命增王子近得東路土勇聲勢益
振設伏詐敗擊斃英兵四十餘名三月初三日
復由絞澤夜發勁勇掩襲其寨立斃英兵一百

餘名棄寨潰走奪獲軍械輜重無算英退紮阿
瓦老城該王子一意安民絕無騷擾遠近稱頌
歸從日多滇邊烹岡野人經英誘和未允十三
日野夷乘其不備中路埋伏並劫英營壘連斃
英首二員英兵十餘名奪獲西瓜礮洋槍多件
現結疆黨土匪誓與英抗稔祚各處亦仍堅壁
抗拒英不能勝乃移兵攻取緬邊早控地方進
攻捧千緬木邦土司所屬野夷聞往投英新街
又復增兵運糧猛卯沿邊均聞風驚惶等情臣

維英雖據緬要地而緬嗣既能得眾強夷更未服從此翕彼張疲於奔逐現攻捧干意在置強攻弱實屬陰狡異常查捧干與騰越猛卯土司接壤猛卯與龍陵遮放土司毘連彼既趨重於此則兩路防務尤爲喫緊且烹岡亦在猛卯隴川兩土司邊界相距均僅二百餘里現該野夷雖能用命英旣敗衄必復增兵野人軍火缺乏已密飭騰越鎮廳酌察情形陰助其急至龍陵一路前據統帶防軍古州鎮丁槐調派參將木

逢春帶兵二營前往督同土司相地布置並派
殷廷貴帶兵一營駐紮杉木籠以防猛卯一路
該統帶四路策應辦理尙屬周妥除飭各路認
眞巡防並飭再行隨時確探馳報外所有近據
邊報及籌防情形謹會同雲貴督臣岑毓英恭
摺馳陳伏乞

皇太后

皇上聖鑒訓示謹

奏

報緬事近日情形摺

奏爲據報緬事近日情形恭摺仰祈

聖鑒事竊英襲緬都緬人不服前據探報由驛馳

奏在案嗣本年正月以來迭據騰越同知陳宗海

稟轉據新街坐探舉人張成濂報緬地官民紛

舉義兵各處土司四起響應集有六七萬人之

眾約至緬都會齊英人甚恐又聞稔祚瑞波等

處士兵與英開仗擊斃英官四人英兵百餘盜

賊近益充斥洋兵率被截殺英人亦不能彈壓

新街地方仍駐英兵四五百名督工開路修建礮臺營壘緬民紛紛逃徙招去野貫亦多同山傳聞俄美兩國居間持議令英退出緬都緬亦補償兵費議尙未決等情前來臣維緬民苦英暴虐不忘舊君據探情形英遽難撫有其地自未暇狡謀窺邊我之防維正可及時妥辦騰越當新街之衝前已派丁槐一軍二千人馳往駐守而沿邊千餘里防不勝防現復酌定條款檄發各屬整頓鄉團俾民自爲捍衛以濟兵力之

不足除仍飭認真妥爲籌辦及再確探隨時馳
報外所有據報緬事情形謹會同雲貴總督臣
岑毓英恭摺馳陳伏乞

皇太后

皇上聖鑒訓示謹

奏

--	--	--	--	--	--	--	--	--	--	--

擊退蠻匪摺片

再四川巴蠻與巧家等廳縣僅隔一江每值水枯搶渡燒擄上年甫將積匪簸箕力甫殲除

奏報江防幸獲粗安詎該匪之弟簸箕滋角復聚

匪造船意圖大舉經臣風聞比卽飭令沿邊文

武加意防範昨據署巧家同知朱坦能管帶駐

防戰兵參將顏桂芳稟報該匪於本年正月十

七日夜先遣百餘人由石龍偷渡督兵擊退復

於二月二十七日糾匪二千餘人由紗帽石等

處大股冲渡蜂擁上岸立即分佈堵剿無如地方遼闊兵分力單致賊攻破防礮分竄太平場等處焚燒房屋擄去民人百餘名牲畜無算先經臣檄飭署東川營參將何秀峰督帶操兵趕抵該處當會同顏桂芳等激勵鄉團分路兜剿先後陣斃匪黨百餘我軍亦有傷亡匪眾始潰鼻水退回又永善縣對岸另股蠻匪於正月二十二日乘筏搶渡經昭通右營遊擊陳貴督飭防勇踞岸堵禦擊沈木筏一隻溺斃匪黨十餘

人賊始敗退臣維蠻匪爲患勢難越境攻勦沿江千里防不勝防此次分股竄擾雖均擊退難保不乘間復渡現添派參將李文高酌帶昭通操兵馳赴江邊駐紮協同各兵團扼要防守務將首匪簸箕滋角設法殲擒暨咨會四川督臣飭屬堵拏並行西昌縣屬阿都副土職清還被擄人民牲畜外所有蠻匪滋擾擊退及現在籌辦防守緣由謹會同雲貴督臣岑毓英附片具陳伏乞

聖鑒訓示謹

奏

報邱北縣地震摺片

再據邱北縣知縣徐有書稟稱光緒十一年十一月十七日巳刻該縣忽然地震旋起旋止至十二月初十日始定各處均幸無傷損惟縣屬鳳革龍法克村等處地方房屋坍塌壓斃四人受傷數人等情當經行司委員馳往並責成該管道州督飭逐一查勘分別撫恤毋令一夫失所其田禾有無損壞房屋如何修補俟查覆到日酌量情形核辦據藩司會同糧儲道具詳請

奏前來臣覆查無異所有邱北縣地震委勘大概
情形謹會同雲貴督臣岑毓英附片具陳伏乞
聖鑒謹

奏

奏兵練互毆摺片

再臣於本年四月初九日風聞省城外火神廟演戲酬神有兵練鬪毆情事當派弁趕往彈壓已先據駐紮南門外管帶督標防兵遊擊劉映華拏獲九人送縣隨據昆明縣知縣鳴泰驗訊呈單內係督標操兵莊耀興臣標操兵戴貞階城守營操兵吳玉林馮占標臣署勇丁沈有貴陳海清民人彭國清彭青雲李洪興除李洪興外餘各帶傷呻吟難以研訊據供係因城守營

操兵廖紹亭吳玉林二人初入日在火神廟戲場飲酒與人嚷鬧遊擊劉映華防兵什長黃起順會因解勸被毆次日復在該處撞遇爭鬪致將莊耀興等一併毆傷等語並據縣稟劉映華送來受傷防兵楊義昌李開太二名均經驗立傷單又是日傍晚有劉映華差弁來署與臣守門勇丁口角爭辯扭毆推跌致傷亦經臣發縣分別驗究臣查附省重地兵練如此橫行不法已極惟是否避遘相值抑係豫謀糾邀當札委

善後局道員湯聘珍會營勒提確審一面函致
督臣在案湯聘珍以受傷者尙難研審下手者
亦無主名未及究結茲准督臣咨會已將遊擊
劉映華署臣標參將楊玉春

奏參發司審辦係爲整肅營規起見與臣意見相
符除加札藩臬兩司提傳一千確切究明此案
因何起衅如何爭鬪實在情形務期水落石出
毋任推卸支飾迅卽照例詳辦外所有兵練鬪
毆大概情形謹先附片陳明伏乞

聖鑒謹

奏

請變通礦務章程摺

奏爲銅務艱難擬請變通商銅成數並照漕運章程給獎以顧商本而資策勉恭摺仰祈

聖鑒事竊滇省辦理礦務招商經前撫臣唐炯會摺奏請每年於運京足數外餘銅悉准由商運銷旋准部咨是否照定額六百三十餘萬斤辦運足數未據聲明令臣等查看情形辦理等因轉行去後嗣據署藩司史念祖詳據招商局知府全楸績詳稱遵查滇省銅務兵燹後停辦已久同

治十三年奏明試辦迄今十年每年僅能運解五十萬斤中間委紳委官迭易其人調辦不爲不力迨歸商局認辦至上年始運解兩批勉足百萬較之從前定額仍不啻天淵艱滯情形已可概見查礦務惟以銅務爲先而招商特因京運起見第礦稀炭遠食貴工艱所領價值實不足償資本商人利重若不稍示變通未入股者早已不前既入股者亦思抽出似此商情渙散欲求起色不能不策勉兼資寬與調劑擬請自

本年爲始如辦銅一百萬斤准以一成通商一百萬以上准加一成二百萬以上再加一成四百萬以上始准遞加過五成並請仿照漕運章程按等量與獎勵庶商情歆動可望本利日增鼓利有資承辦亦可期黽勉等情由司詳請具奏前來臣等查滇銅自同治十三年試辦原定每年京運一百萬斤特因洞澇山空至上年始辦足數非商力不能逮此然工疲貲費已屬不支各省銅本報解無聞商股又因餘利未沾久無

起色非但舊額難期驟復恐後此每年百萬券亦難操該司等所請變通商銅成數量與獎勵係爲維持京運保固商本起見合無仰懇

天恩俯念調辦艱難暫准變通商銅成數並照漕運章程量與獎勵以顧商本而資策勉實於礦務有裨除咨部查照外謹合詞恭摺具陳伏乞

皇太后

皇上聖鑒訓示謹

奏

請 旌獎孝婦摺

奏爲割肝刲臂之孝婦至性可嘉籲懇

旌表以維風化恭摺仰祈

聖鑒事竊據署蒙化直隸同知卞庶凝詳准儒學教

授兼署訓導趙多能牒據廳屬紳士趙鍾燦等

呈稱查有鎮南州守節孝婦呂歐氏係貢生歐

錫芝室女生於道光二十九年長適同籍職銜

呂嘉鼎爲妻同治十年夫故氏年二十三歲遺

腹生子守節奉親光緒八年其翁呂海樞任蒙

化教授病篤醫藥罔效昏夜祈禱疾益亟徬徨
無策割肝煎湯以進翁病旋瘳十年翁再病氏
復剜臂和藥雖終以老疾不起而性情肫摯鄉
里咸稱現年三十八歲苦志撫孤哀如一日由
廳查取冊結申由司道詳請會

奏前來臣查定例割股或致傷生不准

旌表如有請交部議者其入祠建坊之處請
旨遵行等語近年具

奏成案均蒙

恩旨准旌茲該孝婦呂歐氏克守女箴求療翁疾孤
行一意良能實本良知共諒初心愚婦何嫌愚
孝鄉評既協流俗可風合無額懇

天恩俯准

旌表以維風化除冊結分送部科查照外理合會同

雲貴督

臣

岑毓英雲南學政

臣

戴鴻慈恭摺具

奏伏乞

皇太后

皇上聖鑒訓示謹

撫滇奏疏卷四

三

益

齋

奏

奏酌籌經費以濟夫馬而省支銷摺

奏酌籌經費以濟夫馬而省支銷請

旨飭部立案恭摺仰祈

聖鑒事竊滇省夫馬向由民間供應每年約費數十萬金浮派濫支最爲擾累前經督撫臣奏奉

諭旨永遠裁革自光緒九年正月起酌定章程由善後局給價僱募籌款支銷勢難爲繼自邊防多事軍需尤屬浩繁滇本瘠區協撥各饒未能源源解到羅掘皆空民間之派累雖除庫局之支

應益窘舉凡試差到境學臣出棚閱邊馳驛查
案勘災一切要差往來以及科場人夫解審人
犯在在均須僱價動輒掣肘款無可籌州縣無
米之炊未免藉口貽誤臣毓英在開化防營接
見邊郡紳耆僉以民累雖除而地方官力難自
贍苦累益深目覩情形義難膜視且向來按戶
輪充如設棚守哨修路濬渠諸務浸將坐廢情
願仿照四川省三費章程按糧酌收經費以資
津貼等情臣毓英採擇羣言復經臣凱嵩督同

司道首府傳集三迤在省紳耆公議期於官民
兩不徧累聞言均極樂從旋據善後局司道會
同前藩司龐際雲核議擬定每秋米一升抽錢
三文米折蕎折條公等項以銀一兩作米一石
其有銀米並納之田只按米抽收不再計銀均
由地方官填給印票爲據以免侵蝕浮冒之弊
統計闔省現徵錢糧分數每歲約可抽錢五萬
餘串除各州縣分別額徵多寡准坐扣一二成
以爲招解巡檄等費外其餘儘數照市易銀可

得二萬餘兩分解藩糧二庫儲備善後局按照
詳咨章程隨時給價僱募以資用度如尙不敷
另行籌補詳請具

奏前來臣維夫馬爲常用不可少之需值茲饑項
支絀涸注無資自宜審度權衡就地籌畫該紳
耆所請仿照川省三費章程按糧酌收經費爲
數無多實屬有濟於用無病於民且事由省局
酌支取之有經用之有節章程尤較謹嚴相應

奏明請

旨飭部立案永遠遵行滇局幸甚除咨部查照外謹
合詞恭摺具陳伏乞

皇太后

皇上聖鑒訓示謹

奏

撫瀆奏疏卷四終

男
季煜
仲所
景藩
季煌

孫善培校字